

MAY 2025

VOLUME 65 • NO. 05



Khristian Thukizakna



Gingtute i lampi totna a lungsim munkhatna

JOHAN 17:22-23; NASEPTE 2:1-13; 1 PETER 3:8-9; ROMTE 15:5-7; PHILIPPITE 2:1-11

07

MISSIONARY DAY

11

NUTE' NIPINI LEH DORCAS DAY

EDITORIAL BOARD

Editor

Rev. K. Kamchinkhup

Managing Editor

Rev. M. Zalian Guite

Contributing Editors

Rev. Thawndoulia

Rev. Nenglian Vualnam

Production Managers

Rev. Chinkhengoupau Buansing

Upa T. Paukhansiam

Mr. Mangthianlal Samte

Circulation Manager

Upa K. Jamchinthang

C/No. +91 8837208598

Design & Setting

Upa Khuplajem Guite

Mr. Chinsuanlal

CONTENTS

1. EDITORIAL	: 1
2. GINGTUTE I LAMTONNA AH LUNGSIM MUNKHATNA	: 2
3. MISSIONARY DAY	: 5
4. NUTE' NI MESSAGE	: 10
5. BIBLE STUDY	: 14
6. GAMMIAL AW	: 21
7. DORCAS CORNER	: 26
8. YOUTH CORNER	: 28
9. CHILDREN'S CORNER	: 30
10. MUSIC CORNER	: 32
11. EBC INNSUNG THU	: 34
12. THU TUAMTUAM	: 36
13. ORDAIN SUNNA	: 38
14. KIPATHU GENNA LEH THUMNA DINGTE	: 39

LAKMAN:

Kum khat ₹ 150.00

Dak ah ₹ 200.00

Bu khat ₹ 15.00

Thusuah ding piakna:

Editor,

Khristian Thukizakna

Dorcas Hall, P. O. Box - 6,

New Lamka,

Manipur - 795006, India.

*Thusuah sung-a kigente
Evangelical Baptist Convention
Saptuam ngaihdan a hikim kholkei.
Thusuahte'n amau thusuah ah moh a
pawtek ding uh.*

Ilampite enchian a i taksap leh poimoh sukha dia sep ding Ilunggulhna nei in hun paisa ah editorial i gelh hi. Jesu Khrist “Nnagot Thupi” i buaipih lai in, hiai nna liantak sung ah alianpen “Nungzuite bawl” chih naktak a poimoh i hi i na chita hi. Hiai pen en poimoh hi a i gentawm himaww lou in, Laisiangthou a Saptuam neitu’n hon got nna ahi a, i ngaihsak louh theihlauh ahi.

Khrist nungzui i chih, Khrist gingu, amah sinsakna leh hinkhua kisin a zuitu genna ahi. Mathai 10:25 ah Jesu’n *“Nungzui a heutu bang a a hong om leh sikha a pu bang a a hong om tuh a hun e.”* chi in nungzui in a zuih, a heutu bang a om ding ahihna gen hi. A omdantak ahihle, Khrist nungzuite a ding in i zuihpa Jesu Khrist bat ding ahi. Khovel a mite’n gingu om dingdan leh lamet tampi gen leh gelh a nei ding uhi. Himahleh, Khrist batna pen a tehna lianpen ahi hi. A Chiangsem a gen in, mihing lamet leh tehna zang a ei kigenmawwnate a diklou tampi omkha ding hi. Himahleh, Jesu Khrist tehna leh aman a nungzuite hih ding leh hihna ding a gente a kingazaw hi.

Saptuam in Khrist nungzuihna mah poimoh i hi i chih lai in, i gam a thiltung leh hiai pansan a mite hon muhna leh Khrist hon lametnate i velkhawm Chiang in ngaihtuahna a sukha mahmah hi. Tunai a Lamka sung a namkal kitheih siamlouhna a om hun in, District Administration lam in kilemna om theihna ding in Lamka sung a civil society organization omte leh saptuamte Evangelical College of Theology, Nehru Marg ah hong samkhawm uhi. Huai hun ah, District makaite thugen “Pathian ni a biakin dimzen a kaite bangchi?” “Na bible un, ki-it ding, kingaihdam ding hon sinsak hilou hiam?” chihnte zak haksah lah seltheihlauh khop thudik ahi hi. Hiai pen khotang vaihawmte hihkhel hiam mipite thulimlouh chih sang in saptuamte’ lohsapna kilatna ahi mahmah hi. Poi petmah hi!

Toupa Jesu Khrist in, Johan 13:34,35 ah *“Thupiak thak k’on pia ahi, ki-ittuah un; ken nou k’on it bang in, nou leng ki-ittuah un. Na ki-ittuah uleh mi tengteng in ka nungzuite na hi uh chih hiai ah a thei*

ding uh” ana chi hi. Gelh dang ah, Pathian it ding leh mihinpihte it ding *“thupiak thupi pen”* ahi chih Jesu Khrist sinsakna ahi (Matthai 22:37-39).

I gam dinmun apan i et chiang in, Khristian kichi leh biakin kimatzen a omna khopi ah, Jesu Khrist thupiak thupi pen naktak a bohshiat in om hi. Aman mite’n a nungzuite i hih (leh hilhouh) ahon theihna ding ua agen *“na ki-ittuah uleh”* chih leh District vaihawmte thugente i etkhawm chiang in i dinmun kilangchiang khat a om hi. Khrist Nnagotna Thupi zui a nungzui ding a lamet a omte’n Khrist Thupiak thupipen zuikha lou i suak maimah hi! Khrist’ nnagotna thupi leh thupiak thupi pen zuihlou khelhna thupilou hitheilou hi!

Huaiziak in, *“I Lampite Enchian Ni”* chih thupi a neih kum in, i lampi i et chiang in Khrist Nungzuihna lampi ah nakpi a hatlou leh nakpi a panlak poimoh chih a chiang mahmah hi. Hiai toh kisai in, i saptuam sung ah a lianpen apan a neupen tan in kal suanthak in, Khrist deihsa bang a nungzuite bawl ding a kisa ding in i kichial thakthak hi. ■

GINGTUTE I LAMTONNA AH LUNGSIM MUNKHATNA

Pastor Lalmalsawm, Kolkata EBCC

THUPATNA: Gingu hinkhua pen a tangpi in mimal khualzinna sangmah in khat sang a tamzaw ahon a tonkhawmna in genkhazaw hi. I hotdamna pen mimal thupukna apan piang ahi chih bel i haih hetkei hi. Himahleh gingu nih leh thum lungsim munkhat a kithuahkhawmte i hih ding uh Laisiangthou hon deihsa ahi. Ban ah i mihinpihte lak a leichi bang a al ding leh midangte panpihtu hi dia khawnvak bang a tang ding a thupiak kemte i hi. Tuabang i hihtheihna ding tuh i gingu hihpihte toh i khualzinkhawm sung teng a lungsim munkhatna neih ahi.

Tulai in i gam a Khristianna keniam ahi diam aw, chih ding khop in khotang siatna in hon

chiimbua i ahi diam chih in om hi. Tua zia mah a hiding heutute’n *“I Lampite Enchian Ni”*

ahon chih uh. Gingu akichi ngenta, eile-ei kal kikhemna, kinakna, kilangbawlina, kihuatna, kidouna ngenta zak ding leh muh ding a om mawk a, lamdangsak in om mahmah e. Gingtute om dingdan chu hipeuhmahlouahi. Laisiangthou hon sinsak dan leng hilou ahi. Pathian theiloute hileng bel ahi ding mah chihtheih. Jesu'n leitung ahong siklai a Farisaite a ngohnate khempeuh ei gingtute a dik ding bang mawk ve aw. I khotang hinkhua tuh i khalam khosakna limlang ahihman a khalam vai kivelna ding tampi neilai i hi ahon chisak.

Lungsim munkhatna a gingtute om ding i hihdan Laisiangthou mun tamtak ah gen in om hi. Gingu masate "lungsim mun khat leh ngaihtuahna mun khat in a-om ua..." (Nasepte 4:32) huchi in a hong pung hulhul ua, midangte zahtak in aom uhi. Peter in a laikhakna ah gingtute kiang ah "lungsim mun khat in om unla, kilainattuah unla, thunuilut in om un..." chi in hon hasuan hi. (1 Peter 3:8). Gingtute lungsim mun khat a i om leh a gag kipahhuai mahmah muh ding om ahi. Tuabang a omlouhna ahihleh gingloute toh kibang a khosakna

ahi. Telding leng omtuanlou, gingu i hihleh i gingu hihpihte toh lungsim munkhat a om ding himai ahi.

PANLAKNA DING KHATNA: Lungsim munkhatna a om theihna ding in **i mihinglui a sih ngeingei ding ahi.** Paul in

Ephesa Saptuamte kiang ah Khrist a khat suahna thu ana gen hi. Juda leh Zentel gingtute, gingu ahihma uleh gingu ahong hihhun ua a dinmun uh Chiangtak in hon gen hi. Gingu ahihma un, zeksumte leh a sumloute a kikhen ahi uhi.

Amou kal ah kideidanna baang a om a, kichimatna omthei lou hi. Himahleh Jesu Khrist sisan ziaak in amah gingtate a ding in amah akhat suahna, kideidanna bangmah omnawn lou nihte daltu baanglai hihchip hita. Huaiziak a nihte khat a gawm a om Pathian tate, mihing thak zeksum leh sumlouh in gennei nawn lou hi. Hinkhua lui a sih ngai ahi. Hihna masa pen a nanungzaw in a khekkhiak ngai ahi. Juda leh Jentel a tuamna uh paihkhiaak vek a Jesu a mithak a suahna uh a let tinten Chiang un khat in luangkawm thei uhi. Huaiziak in i mihinglui, i hihna vuilliamsa gamtatsak nawn louh ding ahi. Tua in

kituahlouhna leh kimelmakna tokthou kha sek ahi.

PANLAKNA DING NIHNA:
Gingtu khat-le-khat tung a kiniamkhiakna a om ngeingei ding ahi. Philipite 2:3 ah midangte ahoihzaw a mu thei ding a hasotna thu i mu hi. Sa a hihna, mihing dan a suantheih banghiam i neihte koikhkhiak ngeingei ding ahi. Gingtu dangte toh kiteh a, hoihzaw, lianzaw, teizaw kichihtheihna ding khawng kaikhawm a, tungnun i kituh leh lungsim munkhatna i lak a om thei hetlou ding ahi. Huai ziaik in i gingtu hihpih khat pepeuh tung a i lungput a dik ngai a, i kilaklet a suan ding i hauhluat leh tuate'n i gingtu hihpihte toh kilemloupi a hon omsak gige ding ahi. Kingaihniamna a etton dia hoih pen i Toupa Jesu Khrist ahi. Van a athupina tengteng suahkhia in, lei mihing bang a hong piang ahi. Ei thuaktang thuak ding khop in hong kingainiam a, sihna hial ahong thuak hi. Gingtu hihpih khat khelhna leh mohna po-ngam ding khop in kiniamkhiak leng, amah toh lungsim munkhat a om haksa hetlou ding ahi.

PANLAKNA DING THUMNA:
Saptuam pen pawl kibawltawm dangte toh kibang a et hetlouh ding ahi. **Saptuam omzia leh a tungnunna theih chiang ding ahi.** Lungsim munkhatna gen chiang penpen tuh gingtute Saptuam a omna ahi. Paul in taksa pumpi pen Saptuam genchetna ding in ana zang hi. Taksa kahiang tuamtuamte' pumpi khat a aom bang in, gingtu milipte Jesu Khrist pumpi ah ki-omkhawm vek hi. Tua pumpi, Saptuam, lutang, Jesu Khrist ahi. Gingtu teng in Jesu lutang in nei ua, kizopna kiptak om hi. Jesu toh a kizomkhin gingtu khempeuhte, amau leh amau zong ana kizom uhi. Tua kizopna omsak leh kembit a tha pepen lungsim munkhatna ahi.

Gingtu khat tang-om kichi om theilou a, a-omna Saptuam ah hiang poimoh mahmah ahihna a suk buchun ding ahi. Biakkhawmna, sep-le-bawl, thilpiak leh thumna a atel ngeingei ding ahi. Pathian min gingtu mi malmalte Saptuam pansan in amah adia theihpihtu hi ding in a zang hi. Pathian gam nasepna pen Saptuam sung leh saptuam tawn ahih ngeingei ding ahi. Saptuam sung a member hihpihte toh pangkhawm,

semkhawm leh kithuahkhawm in Pathian i bia in Anna sem ding uh ahi. A gingtu hihpihte toh semkhawm theilou tuh Pathian nasem tak ahi kei.

THUKHITNA: I niteng hinkhua a lungsim la lianpen sum hia, nekzonna hia, tate leh inkuante, leh khovel vaite ahiehleh, i gingtu hihpihte toh kilem gige lou ding i hi. I niteng khosakna in Pathian toh ahon kigamlatsak ding hilou a, i sum-le-pai leh i nekzonna tungtawn a Pathian bia leh Anna i sep ding hizaw ahi. Pathian pen a masa a i koih gige ding thupi ahi.

I mihinpihte abik in i gingtu hihpihte toh hun teng a kisai kha a kihetkha gige i hi. I mihinpihte toh kilem a i omna ding in Pathian toh kizopna ahoih gige poimoh lua ahi. Pathian hon itna leh ngaihdamna i tan phawk gige kawm a i mihinpihte et ding ahi. Niamzaw leh vuallel bang a

i om hun leng om inteh, kilemna ding ahieh a, Pathian min gensiat a om louhna ding ahieh nak leh thuak dia kimanna a om ngai ahi.

A tawpna ah, i gingtu hihna sepsuahna tuh Pathian Lalgam kekletna ahieh ding ahi. Tua nna sem ding in Pathian mimal ahon hondam a, Saptuam ahon pia hi. Saptuam sung a kituak, kipumkhat a i din chiang in gamthak lak leh gal zoh theihna ding thahatna om hi. Kituahna leh pankhawmna pen i pianpih hilou ahi, himahleh huai ding a piangthak i hi. Gingtu mimal chih in i lampi totlel enchian ni. Gingtu kuahiam toh kituakthei lou, langbawl leh muhdah i nei kha di e! Tuabang toh gingtu nun pathei lou ding. Pathian lam nga kik leng Amah vak ah lungsim munkhat in i gingtu hihpihte toh omkhawm a pangkhawm thei ding i hi. ■

MISSIONARY DAY

“Kros thuzaw mang thang lette adia haina ahi --- Hotdam lette ading in thilhihtheihna ahi” I Kor. 1: 18 --- 31

Missionary Day chibai! India malsuah bial Manipur South a Tangthupha lutdan saulou in ensuk leng ka chi hi. Sawltak Lian 12 lak a Thomas AD 52 in Kerala a Muziris hongtung a, India adia missionary masapen ahi. Sawltak Lian Bartholomew leng

India hongtung in Tanchin Hoih Mathai Gelh kopi 1 nusia in, gamdang bangzakhiam tawn in Armenia ah pai kichi hi. July 9, 1706 in German mi nih Bartholomaus Ziegenbalg leh Heinrich Plutschau Tranquebar, India hongtung ua, protestant missionary masapen ahi uhi.

Manipur a Tangthupha lutna Rev. William Pettigrew February 6, 1894 in Manipur khopi Imphal lut in Government official-te ading in Lower Primary School hong in sintu 80 nei hi. Maj Maxwell in Rev. Pettigrew deihtelna 2 tah in khatzaw sam tel ding in: **Manipur pawtsan ding leh singtanggam a lemtangna mun khatpeuh a mission nna sep ding.** Kum 1896 in Ukhrul ah paita hi. February 1, 1896 in Manipur ABM Mission Field suak a, Rev William Pettigrew pen Manipur a Baptist missionary masapen suak hi.

Welsh Halhna 1904-1905: Evan Roberts in kum 18 sung Pathian kiang a halhna ngen in thum a halhna thupitak tung hi. North Wales Quarry Slate Mining Business nusia in Watkin Robert Missionary din kipia hi. *Pharmacy course* sin masa in Missionary kuan masa Dr Frasers nungzui in ‘ginna a toh kalsuan in,’ *independent missionary* ahi. December

9, 1908 in Fort Aijal (Aizawl) tung hi. Mite’n Robert *Pu Sap Tlangval* chi ua, Dr Frasers bel ‘*Pu Dakdawra*’ chi in, azi Mary Cathrine pen ‘*Pi Dakdawri*’ minvuah uhi.

Macedonia Sapna: England a Hamstead khua a nungak **Emily Davies** in Rev. Watkin Roberts pound 5 (huai hun a Rs. 75) khak hi. Roberts in November 1909 in huai sum in Lushei pau agelh Tanchinhoih Johan Bu 104 lei in hawmkhia hi.

Manipur Senvon a kipan damdawi lei dia hong kuan khat akipan tanchinhoih zakha nailou uh ahihdan theikhia ua, Tanchinhoih Johan bu 1 puasak uhi. Senvon hausa Pu Kamkholum Singson in Tanchin Hoih Johan bu a muhtak in a sunglam pek awng a hiai thu gelhsak hi: “**Pute aw, noumau hong pai unla, na Pathian thu uh hong hilh un**” **chih**, khakkik nawn vengveng hi. Rev David E Jones leh Roberts in amuhtak un ‘**Macedonian Sapna**’ bang a ngai uhi. Watkin Roberts

in Manipur apan laisim a om tuailai 2 Thangkai leh Lungpau tonpih in, Senvon tan lamhilh ding leh Aizawl tunkik Chiang a siamsinna panpih ding in chiam hi. Amau leng lemsa uh a, gingu mi 5 ban a vanpua dingte toh kipatkhiak pih pah uhi.

Manipur Senvon Khua

Lutna: Rev David E Jones in thumsak a, Pu Thangkai leh Pu Lungpau makaih in Rev Watkin Roberts leh a lawmte Seppatni January 31, 1910 in Aizawl ah kipankhia uhi. Tuivai kan in Manipur a Parvachawm tawn in, February 13, 1910 in Kawnzar, Senvon khua lut uhi!

Senvon khua a lut phet un mikang mukha ngeilou khosung mi khenkhat lau in taikhia ua, dainawl ah kibu uhi. Mi tamtak in aktui, nahtang leh nekding tuamtuam pia uhi. Sun-le-zan in Pathian thu gen ua, mite'n lamdangsa mahmah uhi. Daileng dia Roberts a kuan leh vokpi hon in zui huthut ua, "Vokte leng pil thei na uchia, achi hi. A zing in Roberts in John 3:16 na sim in **"Jesu Khrist gingta un"** chi in thugen zou hi. Solkal phalna lou a Manipur lut ahihman un ni 2 lel nituang in Aizawl ah kikhawn uhi.

Missionary Day May 7: Rev. Watkin Roberts in *Christian Victory Magazine*, February 1958 issue ah "gamlak haksatak tawn a ni 14 zangbei in Aizawl apan Senvon khua ka tung uh" chih gelh hi. A kikhawn un Senvon apan Parbung, Sartuinek, Tuilung lui kan in, Lushai Hills a Vervek khua tung uhi. Pu Thangkai leh Pu Lungpau in Vervek khua ah February 17, 1910 nitak in Jesu Khrist pom ua, a ngawng ua a okh uh aknel sutkhia uhi. Amau gel Manipur simlam a Pathian thu-awi masapen a chiamteh ahi uh.

Rev. David E Jones in Aizawl biakin ah vaidawn a, Rev. Roberts leh a lawmte'n report pia uhi. Hausapa leh mite siamdun, Tangthupha adia mite kihondan a zak un kikhawmte kipak zak uhi. Dr Frasers in 'Manipur a Tangthupha gen dia kipumpiak kua na hi ua?' chi'n chouna bawl a, mi 3 kipia uhi.

Manipur gam killawi a Tangthupha genna dia vanzat hoih pen Rev. W. Roberts in amuh tuh agam mite zat ahi. Rev. W. Roberts in Rev D.E. Jones a kipan a damdawi, sinlai bute leh vanzat poimohte

kaikhawm pah uhi. Pathian muang leh thum kawm a mahni *palbawm* (bawmrang) chiat kipuak in, April 22, 1910 in dawile-kau bia a, selung mawlte lak **Senvon** zuan uhi.

Aizawl a kipan Seling ah giak ua, huai a kipan Chawngzawl ah giak in nituang uhi. Changzawl a omsung un Aizawl apan Rev. W. Roberts in Manipur lut ding a phalna *telegraph* ngah hi. Changzawl apan Vanbawng ah giak uhi. Vuahtam zia in **Tuivai** khanglua in kan theilou uhi. Vervek ah ni bangzakhiam nituang ua, nitak teng in Pathian thu gen uhi. Pathian kha in nasem a, mi 100 vel Pathian thu-awi di'n kipia ua, vuahzu leh tuilian Pathian lemgel ahi, chi in, lungkim mahmah uhi. Huai khua a atamsung un, sumdawng a kivei Mr. Narain Singh Meitei toh kimukha uhi. Aman Long in Senvon hoh dingte pua in, gamgi *Raman Suah* kichihna ah Tuivai kanpih hi. Manipur leitang Tuivai piau a sik phet ua kipak lua in Missionary te'n Pathian phatna la sa in, maban pizel dia ngen in thum uhi. Manipur leitang a kisa masapen hiai la ahi:

“Aw Pathian Nangma’n
Tangthupha nawn pia (2),
Kipathu k'on hihl (3),
Nang kiang;

Haleluijah! Amen. (3) Amen! (3)
- **Biakna Labupi No. 21**

Gamlak paina ding theilou a omlai un ngabeng a kuante tuakkha in, amaute zui in **May 7, 1910 in Kawnzar, Senvon** khua tung uhi.

North East India General Mission Leaders' Conference, 1960 Chairman Rev H.L. Sela makaih a Golden Jubilee Lopna hun ah Missionary-te hong tunni May 7 pen **official** in ‘**Missionary Day**’ a pom in, namkip leh zatden ahi.

Tangthupha deihuai paizel in: Saptuam makaiten hiai Tangthupha Leilak a kesak mai lou in tawisawn zel in, Saptuam hon paipihtou zel uhi. Guite kual, Thangkhal kual, Burma a Chin state gam leh Bawm gam ah Tangthupha ana paipih uhi. Kum 1975 in Missionary Box pua in EBC omna khua teng kipai in, Missions a halhna thupitak tung hi. Hiai Missions nasepna in i gamsung nakpitak in hon tokling a kikhekna thupitak hon tun hi. Saptuam in tup leh ngim khatna in

Missions kinei hi. Kum 1967 akipan in Manipur a Meiteite lak ah Tangthupha na sepna kipan in kum 2023 May 3 akipan buaina hong omtak in kisemzom theinawn lou in kum 2024 in nutsiat in om hi. Kum 1972 akipan in unau Karbi mite lak ah nasep in pannawn ua-- lam chi tuamtuam a i sepnung un Saptuam amau a kidin theita dan angai in, amau kitoudelhsak in KAEBK khut ah kum 2020 in koikhkiak ahita. Kum 1982 akipan in Nepal gamsung aginglou mite lak ah nasep i pan nawn ua, Toupa pina leh makaihna toh kum 2025 akipan amau kitoudelh saktum in kisinsakna i panta ua, apai hoih theihleh kum 2029 chiang in amau khut ah koikhkiak kisawm hi. Kum 2012 in Missing namte veina toh Dhemaji Field ah nasep i pannawn ua, Pathian hehpihna toh lam chi tuamtuam zang in Tangthupha genna in masawn touzel a, Saptuam nasep paididan zuikha dek panta in, khantouh lam ahon manoh uh i lamet leh i thumna uh ahi.

Kum 2017 in Sikkim leh kum Jan 27, 2022 in Kamlabagan station Darjeeling Dist. W/B a Nepali ginglou mi omte lak

ah nasepna i pannawn ua nasepna pai hoih touzel a biakkhawmna mun tam ah kinei zou naikei mahleh kep ding leh kithuahpih ding mi Toupa'n ahon piakte uh ziaak in kipahtu gen in, a masawn zelna ding in i thumsak hi.

Kum 2019 in Assam ah District bangzakhiam huam in Field khat in pannawn ua, nasep didan leh kalsuan ding dan musuah panta in, field office/centre hong in kal suan i sawm ua, Toupa kha pina toh hoihtak a i sutzop theih uh kilamen mahmah in i thumsak ahi.

Kum 2023 in Kamrup District akipan in Assam Missions Field thak i pannawn ua, lam tuamtuam in kitem tou a, sawtlou a biakkhawmna i neih pah uh lamet ahi. Assam district 3 huam a kibawl ahi. Kamrup, Goalpara, leh Hojai - Rabha namte leh Assam Meitei leh Amri Karbi mite khalam veina ziaak a neih ahi.

Miten Gospel amuh chiang un mun khat ah tutpih den theilou uh, genkhiak theihna ding zong in kalsuan khezel uhi. Nang na Gospel muh pen na Comfort Zone a tutpih a koihdapna hi leh na meikuang koihna

Toupa'n hon suankhiaksak khading ahihman in, kalsuan khiakpih ding in i kingen hi. ***"Khrist itna in hon sawlteitei ahi; hichi'n ka ngaihtuah uhi: mi tengteng sihsik in mi khat asi a, huaiziak in mi tengteng asi uhi" I Kor. 5:14.*** Mite'n Tanchinhoih atan khak Chiang un hichi'n gen uhi...

"Tanchinhoih gen mahleng kisaktheihna ding ahi kei hi. Hihlauh theihlauh ka tung ah akinga ahi; Tanchinhoih gen keileng ka tung gik ding ahi" I Kor. 9:16.

Tangthupha na muh pen koi ah na koih a? A gen ding in na kuan diam ahihkei leh na tang ding kua na sawl dia? ■

NUTE' NI MESSAGE

Rev. Dr. M. Khamkhanchin

Thumapi: Saptuamte hon neitu, i Toupa Jesu Khrist min toh Nute' ni Chibai Aw! Khristian Thukizakna Editorial Board in "Nute Ni Message" gelh dia hamphatna hon piak hamphatna mah a la in Nute' Ni toh kituak ding a ngaihtuahna a hong om bangbang k'on gelhkhia a, simtute a dia khalam vualzawl na hong hih ding ka thumna ahi.

Anna M. Jarvis (US) in a nu it mahmah Ann Jarvis 1905 kum in a na suunta hi. Tua ni apan, Nu' itna leh manphatnate a gen a genzoh vuallouh ana hih dante hon phawkkhe semsem in, *Nu Ni* chi a ni khat septuam a Nute pahtawina sangpen piakna - Official Holiday neih ding lunggulh in pan honla hi. A lunggulh mualsuahna hi ding in, 1914 in President Woodrow Wilson in, *May 2nd Sunday Nute' Ni*, Official Holiday hiding in hon puangkhia in, tua ni a pan,

hiai ni, *Nute' Ni* in hong kizang tou hi. Ann Jarvis bang in en leng hiai hun poimohtak ah Nute manphat dan, pahtawi tuak mahmah uh ahihdan uh kikum khawm leng i chi hi.

I. NUTE' MANPHATNA: (Nute Pahtawi taak ahihna uh) *Pau. 31:10-31 (t. 28 cf 12:4)* "A tate a thou ua, amah *nuamsa* achi uhi; a pasal inleng amah a *phat* hi. Numei hoih a pasal' *lallukhu* ahi"

Khovel ah "NU" chih kaan a lohnuam leh i loh mun a om

diam aw..! Nu i chih insung a pa hileh tate hileh lungsim kigawmkhawmna pen ahi. NU omna insung ah “NU” chih kammal a “*thunon*” ahi mai hi. Naupangte muk ah “nu” chih a belh hi. W. M. William Thakeray in, “*naupangte muk ah NU min loh Pathian min loh bang a manpha ahi*” a na chi hi. Insung mi kuamah peuh hohkhiakna nei, inn a tung masa a tung nanung in a kan masak pen uh tuh NA NU/KA NU KOI A OM? chih ahi chi leng khial khol kei ni hang. Paunak in, *‘Pa in inkuan tungkhia a, nu in inn lua lum hi’* chi hi. Nu tellou in insung kiluahlum zoulou hi. Nute, hiaibang Manphatna petu, Toupa min phat in om hen. AMEN! Nute’ manphatna naktak i genlai in, a mohpuakna uh lam leng kikap tuak mahmah i sa hi. Hiai a nuai a bang in kikum leng i chi hi:

II. NUTE’ MOHPUAKNA:

1. *Pasal toh kal ah:* Zi tamtakte lungput ahiding mah dan a koikhak a omkha sek khat tuh, “kei, zi hita ka hihna ah, ka pasal in bangteng hon hihsak thei a...” chi a, lungsim vakkualsak sek bang ki-omkha thei hi. “Pasalte’n bang hon hihsak thei

hiam” chih sang in, panpihtu (Gen. 2:18) hihna thei gige kawm in, “**ken ka pasal a ding in bang ka hih sak thei diam aw ?**” chih lungput a neih gige ding ahi hi. Paul in Ephesate lak a a Laikhak a ana taklat, (Ephe.5:23) *Khris Saptuamte’ Lutang ahi mah bang in, pasal tuh zi lutang ahi* chih mangngilh lou a, pasalte lak a kiniamkhiak lungput toh zi ahihna a semsuah gige ding. Huan, tate’n thil anget Chiang un *na pa dong masa ni maw...?* chi thei zel le uh nu inleng pate (pasalte) azahdan uh leh nu leh pa a kithulak tuah dan uh tate mahmah inleng thei ding uhi. Ruthi bang in, pasalte toh pumkhat ahihman in pasalte nu leh pa, sanggam leh tanaute mahni pianna leh pianpih laizom bang a pomtheih poimoh mahmah hi. Thu hoih tampi gengen sang in omdan/hinna hoih tungtawn a thu gen phatuam zaw hi.

2. *Tate toh kal ah:* Nute a ding in insung mission field leh missionary nasepna mun poimoh pen ahi. Insung adik louh Chiang, asuk poikhak tam mahmah sek hi. Tate zak a mi gensia, mohsak kampau zat lauhuai mahmah hi. Tua a hihman in Nute tuh tate a ding

a hinkhua hoih leh hoihlou pawtkhiakna tuinak ahi. Nu tuh tate a ding in sintungbu hi taktak hi.

Ø Galhat minthang Napoleon in, *'Nu hoih honpia un, huchi in nam hoih ka hon pe ding'*-nam leh gam hoihna ding in nute poimoh mahmah.

Ø French gam a thukhen sap tukhawmte'n Napoleon kiang ah, -French gam in i taksap pen uh bang ahia chia dotna abawl na uah, hiai bang in dawng hi- *'French gam in i taksap pen uh NU HOIH ahi'* chi hi.

Ø Mahatma Gandhi in- 'Pasal lai i siamsak leh mimal siamsak i hi a, numei lai i siamsak leh inkuan siamsak i hi, chi hi.

3. Midang toh kal ah: Nu hoih in innsung kia hilou, tanau laina lak ah leh polam ah leng thil thupitak semkha mahmah hi.

Numei (zi) kizen leh pilvang in midang toh kizopna, kinaina hoiehtak bawl thei in mite ngaihnat ahih ban uah, nu ziaa a ahampha inkuan suak thei uhi.

Ø **Lenglate toh kisai ah:** Lenglate a na welcome dan siam, neelhuaitak a om - bang toh kisai a hong lengla hiam chih khawng

dongtu ahi ding. Pasalte mu ut ahihleh pasal toh a kihoulum theihna'ng uh hun leh mun bawlsak ding. Amah (numei) va kichinglah lua kei leh ahoih hi.

Ø **Humbittu a pan ding:** Pasalte leh insungmite tung a siatna tungtheite lak apan humbittu a pan theih hi. Tha leh zung leh kalsuan a kul leh - ngaihdam nget tanpha ngap ding ahi. (Ziporah- Exo. 4:24-26; Abigail- 1 Sam 25:1ff)

Ø **Thuguk imsiam ding:** Mi'n muantham a hon ngai a thuguk hon hilh uh leh - mimal/saptuam sung vai/khotang vai ah na muanhuaina langsak gige in.

Ø **Kamtam luat louh ding:** Gen hun leh hun lou theih ding. Kamtam luat in mite kal ah kisiat kinakna tun thei mahmah hi.

Ø **Lungsim zapi neih ding:** Lungsim chiiptak leh lungsim neulua a i om leh, lungtang natna ding a tam dia, kipahna leh maitaina ding a avang ding. Lungsim lian leh pichin huaitak hinkhua zattheih gige tuppen a neih ding ahi.

Ø **Sungte (pasal/tate) mi toh teh-kakkak ken:** "Kou'pa hu chi tel...nou'pa zaw.. Kou naute hichi.. nou ate zaw' chih dante kam a pawtsak louh inkuan damna ahi gige.

III. NUTE /ZITE PAHTAWI DING DAN: Pau. 31:10-31 (T.28 cf 12:4) “A tate a thou ua, amah **nuamsa** achi uhi; a pasal in leng amah a **phat** hi. Numei hoih a pasal’ **lallukhu ahi**” Ann Jarvis in NU ITNA LIAN mahmah ahihna phawk in Nute’ Ni zat ding hon gelkhiak bang deuh in, tate leh pasalte’n leng ngaihsutna pia in NUTE pahtawitak lua uh ahi mahve... chi thei in pahtawi leng i chi hi.

1. Tate’n nute pahtawi ding dan:

Ø **Zahtak in:** (Exo. 20:1-17) Thupiak 10 poimoh mahmahte chi nih in khen theih: Thupiak 10 lak a, 1na – 4na: Mihing leh Pathian kal a ding ahi a, (ii) 5na – 10na : Mihing leh mihing kal a zat ding ahi. *Hiai laka a masa pen/poimoh pen: “Na nu leh na pa zahtak in: Toup na Pathian in a honpiak gam a na nite a sawt theihna ding in”* (v.12) cf Ephes.6:1. Kol.3:20”

Ø **Lei pathian:** Nu-le-pate’ aw Pathian’ aw ahi, chi leng genkhial lou ding i hi.!! (Eph. 6:1; Kol.3:20) *Naupangte aw bangkim ah na nute uleh na pate uh thu mang un.* (hiai tan a khawllou)...Huai lah **Toupa pahtaklam** ahi ngala.

(Pau.23:22) *Nang honsuang na pa thu...a upat chiang na Nu musit ken!* (Matt. 15:4) *Kuapeuh a nu hiam, a pa hiam gensia tuh si ngeingei hen!* Nu leh pate leitung pathian hi uhi. Tua omdantak tuh, Nu-le-paten tate leh tute khankhua a ding in hihtheih poimohtak nei uh chihna hi a, huai tuh **VUALZAWLTHEIHNA** (Pathian in leitung nu-le-pate tungtawn in tate leh tute vualzawl sek ana hi, chih mangngilh louh hial ding ahi. Nu-le-pate pahtawi leh zahtak a a om chiang un, Pathian thuchiam tangchinna/bukimna hi a, nu-le-pa leng kipak ua, a kipahna uh tate a ding in vualzawl na, lamzanna ahi hi. Nu-le-pate kasetak a koihkhak in vualzawl na muh ding dal thei in inn-gougamna hiam khang kibansapna tan tun thei hi.

Tua ahihman in, Nu-le-pate manphat dan thei a, a upat tan ua leng zah ding bangtak a zah a, itsiamtak leh hawmthohtak a kep leh etkol ngeingei ding tate mohpuak ahi. Khasiat gukna a neih khak ding uh veng a duattak a etkol ding ahi.

2. Pasal in zite pahtawi ding dan: (Eph. 5 : 25) *Pasalte aw na*

zite uh it un, Khrist in Saptuamte a it a, a sik ua a kipiak bang in.

Pasal in a zi itthoh, deihthohtak leh hawmthohtaka akep ngeingei ding ahi. Pasalte panpihtu dia piak himahleh suak/sikha hilou, pasal' pumpi a hihna mangngilh ngeingei louh ding ahi. Nasep, omdan leh kamsuak ah i itdan leh hawmthawh dan langkhe sak in, kamsuak mahmah ah leng *"k'on it/ na ngaihhuai lua"* chi zel thei leng- khalam, salam leh lungsim damna hi mahmah hi. Inn aom tam- pawthat louh, zi leh tate toh inkuan a hun a tamtheipen zatkhawmpih theih tuh insung damna dia damdawi hoihtak ahi. Dr. Billy Graham in *-hihkhelh lianpi ka neih tuh ka inkuan te amau kia a tamveipi ka nawtsiat ahi*, ana chi hial

hi. Mihing, hihkhialthei, kizen gige zoulou i hihna ah, ki-iplah theihna hun, kimohsak theihna hun hong omkha sek hi. Hiai hun ah it-thawhtak a kihilh theih poimoh mahmah ahi hi.

THUKHITNA: Ann Jarvis in Nute pahtawi tuak lua uh ahihdan hon phawkkhiak chiang in tumuang mailou, Nute pahtawina ni tuambik bawlkhe ding a pan hon lak a, hong lohchin mah bang in, en leng NUTE POIMOH DAN leh MANPHAT DAN theih thakna hong hi henla; Nute mahmah inleng a manphatna uh phawkkhe thak a, Siamtu deihna bang a Nu/Zi ahihna uh zangkhe thei chiat ding in Toupa ompihna leh vualzawl na kiching noute a hong hi tawntungta hen. Amen. ■

BIBLE STUDY



Pastor Thuamminlian Guite

Text : Philippite 2:1-18

Thupi: KHRIST' LUNGSIM – KINGAIHNIAMNA LEH PUMKHATNA

Khalui a i Bible Study paizia, Missional Hermeneutics chih i genta. Missions lungput nei a Bible i sim chiang in lungsim a om masa ding bangzahhiamte ahiehleh: Bible pumpi Pathian' hotdamna nasep kigelhna ahi. Hotdamna nasep ah kihel ding in Jesu Khrist tungtawn a mihingte tat leh sap a om i hi. Mimal khalam khanna ding leh Saptuamte Pathian hotdamna nasepna a kihelna ding a thopna ding a Laisiangthou gelh ahi. Huai ahihman in Missions lungput nei a

Bible simna in Pathian' lungput hon theih sak ban ah Tanchin Hoi h hinkhua a hinpih ding a sapna leng bawl hi.

Pumkhat leh Kingainiam ding

a Sapna (2:1-4): *1Huaiziak in Khrist a thu kihilh ding a om a, itna a kinep theihna ding a om a, kha toh kithuahna, kilainatna leh kihehpihna a omleh, 2huai lungsim mah pu in, hichibang itna mah nei unla, tup kibang leh lungsim khat nei in ka kipahna hon hihkimsak un. 3Kikhenna ding leh kithupisakna ziak in bangmah hihkei un; lungsim niamlak in michih in amah sang in midang hoihsazaw hen. 4Na lak ua kuapeuh in amah a ding kia enlou in, midang a leng en sam hen.*

Philippite bung 2na ah *huaiziak* in chi a kipan ahihman in bung 1na a thugelhte sutzopna ahi. Philippite a Saptuamte a omdan uh leh Tanchin Hoi h kituhsak ding a sapna bawl pansan in gingtute'n Pathian Mission sepsuahna ding a poimoh pankhawmna, kiniamkhiakna leh midangte adia kipiakna gen hi. Khrist a kihanthawmna, itna a kihehnepna, kha toh kithuahkhawmna, kilainatna leh kihehpihna chihte a Saptuam kibulphuh leh kilamtouh ding ahi. Tanchin

Hoi h tungtawn in mi hing thak pansan in inkuan (community) thak bawl hi.

Jesu in gingtute a ding a thumna ah gingtute pumkhat a suahna ding un thumsak hi (Johan 17:20-23). Jesu'n thupiak thak a piakna ah hiai bang in gen hi: *"Na ki-ittuah uleh mi tengteng in ka nungzuite na hi uh chih hiai ah a thei ding uh"* (Johan 13:35). Hiai bang a kipumkhatna pen Pathian i itna tungtawn a lahkhiak a om ding ahi. Pathian in Jesu Khrist' sihna tungtawn in nam tuamtumte pumkhat in hon bawl in *"kimelmakna banglai hihchim"* in *"kimelmakna a hihbeita hi"* (Eph. 2:14-16). Paul in saptuamte lak a kitheih siamlouhna in Pathian' nasepna naktak a bahsak ahihdan muchian mahmah ahihman in Khrist tungtawn a pumkhatsuahna a laikhak teng phial ah gen tuantuan hi.

Kipumkhatna omzia genchetna ding in, Paul in gingtute *"lungsim munkhatpu"* a om ding chi hi (tt. 2-4). Paul in Philippi saptuamte itna a khang ding in thuumsak chih

i genta (1:9). Bung 2na ah huai itna tungtawn in *“kha khat leh lungsim khat”* a om ding ahihdan gen hi (t. 2). Hiai in a *kibang* a om ding chihna hilou in *tup leh lungsim munkhatpu* a Pathian nna sepkhawm ding gen hizaw hi. Tanchin Hoih nasepna pen amasa a koih a huai lungput neih chiat ding ahi. Setan leng amah-le-mah a kidouleh a gam khanglou ding ahihman in, Pathian kumpigam keklet a omna di’n Saptuamte lak ah kithuahna poimoh hi (Matt. 12:26). Huaiziai in, itna tungtawn a kikhen ding thilte sang a hon kigawmsak theite ngaihpoimoh a neih ding ahi.

Kigawmna om theihna di’n angmasialna pisan a kiniamkhiakna tawisang ding ahi (tt. 3-4). Kingaihniamna i chih, midangte sang a niamzaw a kikoihna hilou in, midangte ei sang a i ngaihpoimoh zawkna ahi. Hiai a Paul sinsakna pen “phatuamngaihna” toh kinaih mahmah hi. Eilam kimangngilh a midang masazaw a koihna ahi. Hiai tawndan hoihtak i neih uh Laisiangthou in hon sinsakdan toh kituak ahihman in kepbit mahmah ding ahi. Himahleh, khovel khangtou mahmah ah tumlam gamte

sinsakna in naktak in hon zou ahihman in, thuneih utna, dinmun ngaihpoimohna leh mahni kitawisangna in hon zou mahmahta hi. Hiai bangte ziaik in i lak uah kitheihsiamlouhna leh kinakna hon tun hi. I pupate thugousiah uh midangte awlmohna leh Pathian’ nasepna ah phatuamngaihna i letkip thak mahmah uh poimoh hi. Huai mah Jesu’ hinkhua leng ahi (t. 5-11).

Kiniamkhiakna Hinkhua zang ding a Sapna (2:5-11):

5Khris Jesu a om hiai lungsim nei le uchin: 6Amah Pathian bang a om hinapi in, Pathian toh kikim a om thilkhiaklah ding in a sepkei hi, 7Himahleh amah a hong ki-awngsak a, sikha bang in a hong om a, mihing bang a bawl in a hong om hi; 8Huchi in mihing mel a hon pu a, hong kihihneu in si ding in thu a hon mang a, ahi, Kros a sihna a hong thuak hi. 9Huaiziai in Pathian in amah nakpitak in a hihlianta a, min laklak a min tungnungpen a peta hi; 10Jesu min a mi tengteng a khukdin a, vantung, leitung leh leinuai a thil om tengteng leh, 11lei tengteng in Jesu Khris Pa Pathian thupina ding a Toupa ahi a chih theihna ding un.

Tang 5-11 na “*Khrist Lavui*” (Christ Hymn) chi in Laisiangthou sutmite’n gen uhi. Hiai a Krist “hong ki-awngsak” (emptied himself) a chih in Laisiangthou sutmi tamtakte buaina hi. Huailam sut ding i tup hilou hi. I gen noppen ahiehleh, Paul in kiniamkhiakna hinkhua genchetna di’n Jesu Khrist’ hinkhua apan sinlai pia hi. Gensa bang in kiniamkhiakna ahiehleh mahni kimangngilh a midangte ngaihpoimohna ahi. Khrist hinkhua leng huai mah ahihdan Paul in gen hi. Khrist in Ama’ hihna mangngilh in eite a hon ngaihpoimohna ziaik a mihing bang a hong paina gen ut hizaw hi. Paul in huai “Khrist lungsim” nei ding in saptuamte hasuan hi.

Paul in kingaihniarnamna hinkhua Jesu a om gingtute’ etton ding ahi chi hi. Jesu’ mission ahiehleh sit neilou a kipiakkhiakna ahi. Tupmawg a midangte adia hinkhua zatna ahi. Khrist in A thilhihtheihna leh a thupina suahkhia in, mihingte toh kikim a a hong om ziaik in tatna nna hong semkhe thei hi. Hiai bang a “hong ki-awnsakna” pen Khrist’ nasepna a laigil ahi. Huchi mah bang in gingtute’n leng midangte kiang a Tanchin

Hoih nasep i sep theihna ding in midangte adia kipumpiakna hinkhua tungtawn a sep ding ahihdan hon muchiansak hi.

Himahleh, huai bang a kipumpiakna pen a tawpna hilou hi. Tang 9-11 ah Khrist in huai bang a hong thuak chiang in min laklak a min tungnungpen piak a om in miteng amah mai a khukdin a kuun ding in Pathian in nakpitak in a hihlianta hi. Hiai mah ahi, gingtute’n Tanchin Hoih nasepna a i tuppen ding. Huai bel Khrist tawisang a om a, khovel’ tung a vaihawmtu ahiehna lahkhiak a a om ding. Huai kia leng hilou in Khrist’ kingaihniarnamna bang a hinkhua zatna in Amah bang a tawisang a eite leng om ding i hihdan hon theisak hi. Hiai leitung ah hia, van ah, huai bel Pathian’ vaihawmna ahi. Leitung a tawisang a om ding deihna hinkhua in kingaihniarnamna hikhua dal thei ahihdan phawk poimoh hi.

Huai ahihman in Pathian’ nasepna penzaw thilhihtheihna hiam dinmun thu hilou in kiniamkhakna, mite nasepsakna leh Pathian’ thu manna hizaw hi. Khrist lungsim a om huai kingaihniarnamna

lungput nei ding a saptuamte sap a om i hi. Midangte ngaihpoimohna hinkhua leh sit neilou a kipiakna tungtawn in tawisangna i ngah thei pan ding uhi.

Hotdamna Semkhe Ding a Sapna (2:12-18): *12Huchi ahih zia in, ka itte aw, ka omlai kia hilou a, ka omlouh lai a leng thu na man theihtak mah bang un, lau leh liing kawm in na hotdamna chiat uh semkhia un; 13Amah lungtuak dia noumau a hon utsak leh hon semsakpa Pathian ahi. 14Dawngdawng lou leh phunphun lou in thil bangkim hih un: 15Khangthak gilou leh khial, a lak ua khovel vak bang a na tennate lak uah Pathian' ta gensiatbei leh siangthou, 16Hinna thu taklang na hih theihna ding un; huai a kipan a ke'n Khrist ni a hong tun Chiang a, a thawn in ka semgim kei a, a thawn in ka taigim kei ka chih ngamna ding in. 17Ahi, na ginna thillat tung ua Pathian adia buakkhiak a om ding na hi le'ng ka dahkei a, na vek un k'on kipahpih hi. 18Huaiziak mah in, nou leng kipak unla; kei leng hon kipahpih un.*

Tang 12-18 ah thumanna, siangthouna, leh kipumpiakna

hinkhua zatna tungtawn a Tanchin Hoih theihpihna nasep sem ding a sap a om ahihdan Paul in gen hi. Gingtute'n hotdamna lau leh lingkhawm a sepkhiak ding ahihdan gen hi (t. 12). Hiai in hotdamna ding a nasep gen hilou in hotdamtate' om dingdan genzaw hi. Niteng hikhua ah hotdamna thilhihtheihna tungtawn a kikhekna leh Tangchin Hoih hinpihna hinkhua midangte'n a muh theih ding uh ahi. Khovel paizia i et Chiang in Tanchin Hoih doudalna hong uang deuhdeuh ding bang ahihman in, Saptuamte'n hinkhua a Tanchin Hoih hinkhiakpih ding poimoh semsem hi.

Tanchin Hoih nasepna ah Pathian thilhih phawkkha lou a mihing lam ah naktak a panlak theih hi. A nna neitu Pathian ahih phawk poimoh mahmah hi. Pathian' deihna bang a sem thei ding a hon utsak leh hon semsakpa Pathian ahi chih i phawk poimoh mahmah hi (t. 13). Hiai ah mihing lam leh Pathian apan hih ding om tuaktuak hi. Pathian' nasep mihing' hatna a zoh ding ahih louh man in, Pathian' hatna a i kingak ding ahihdan muh theih hi.

Pathian' Mission i gen chia'n, Pathian in Tangchin Hoih gen ding a hon sawl ahihdan ki-uanggen mahmah hi. Lai siangthou siam khat in a genna ah, Pathian in hon sawl chih sang mah in, Pathian in Tanchin Hoih gen ding in Amah a mun ah ana omta a, eite Amah toh semkhawm ding a hon sam hizaw a chih in gennei mahmah hi. Pathian in Saptuamte Tanchin Hoih gen ding a hon sawl hilou in a mun a ana om khinta amah toh semkhawm dia hon ngak hizaw hi. Ama'n thopna poimoh teng toh hon thuam a, eite sang in Ama'n Tanchin Hoih gen ding lunglutzaw hi. Ei lam a poimoh bel, *kimanna* hizaw hi.

Huai ahih theihna di'n, Paul in Philippi saptuamte kiang ah kina lou ding leh phunlou ding in thuhilh hi (t. 14). Saptuam sung ah kinakna leh kigensiatna in Tanchin Hoih theihpihna toh kisai dal thei hi. Khalui a i gensa bang in, Saptuamte omdan khovel in bildoh mahmah ahih man in, *"a lak ua khovel vak bang a na tennate lak uah Pathian' ta gensiatbei leh siangthou"* (t.15) a om ding in Paul in hasuan hi. Khovel toh kisukha lou – kisaikha lou a om ding chihna hilou in, i

omdan tungtawn a khovel zoh ding chih hizaw hi (t.16).

Saptuamte'n missions i gen Chiang in Missions Field i lungsim ah om pah zel hi. Missions nasepna ah a kuankheloute kihelkha lou dan a kikoihna i lak uah om mahmah hi a theih in om hi. I niteng hikhua ah Tanchin Hoih i hinpih Chiang a Tanchin Hoih theihpihna nasep sem i hihdan kiphawk ding ahi. Gingtu i hihna ah a thawnele a semgim i hihlouna ding un lung a tupguhna toh hinkhua zang ding a sap a omte i hi.

Tuchiang in Missionary chih kuate hi hiam chih gendan kikhek mahmahta. Nidang in Missionary i chihte "Missions Field" a kuankhia a "Missionary" chih min puaksak in om uhi. Himahleh, tuchiang in "Missionary" chih in "a min" hizaw lou in a "nasep" hizawta ahihdan misiamte gendan ahi. Missionary chih min nei a Missionary nasep sep ding lam sang mah in, *gingtute' niteng hikhua a Missionary lungput nei a Missionary nasep sem ding* chih ahi. Mi khat in hiai bang in gen hi: Mi kuahiam khat Khrist' itna hinkhiakpih a, angmasialna

tellou a midangte panpih, leh a omna munpeuh (nasepna, minam, leh gamdang) a nungzui bawl ding zongmi missionary ahi chi hi. Huai ahihman in, tuchiang in Missionary i chih Chiang in a min pen sang in nna pen hizaw a, niteng a Tanchin Hoih toh kituak a hinkhua zatna pen hizaw hi.

A tawpna ding in, Paul in Tanchin Hoih khanna ding a a thuakna pansan in thuhilhna pia hi. Tang 11 ah: *“Ahi, na ginna thillat tung ua Pathian adia buakkhiak a om ding na hi le’ng ka dahkei a, na vek un k’on kipahpih hi”* chi in gen hi. Hiai ah eipau ah kigelh kimlou om hi. Huai tuh *“Pathian adia Dawn Thillat bang a buakkhiak”* chih ding ahi. Thukhun Lui ah *“Dawn Thillat”* a kigen Chiang in Mun Siangthou ah Toupa biakna adia uain sungkhia chih genna ahi (Nam. 28:7). Paul in amah hinkhua a et Chiang in Philippi saptuamte ginna adia Pathian adia martar ahihleh leng kipak ding ahildan gen hi. Paul in haksatna a tuahleh a etdan tuam mahmah muh theih in om hi. A haksatna (suangkul a omna) tungtawn a Tanchin Hoih a khan ding a ngaihpoimohpen hi gige

hi. Huaiziak in, dahlou a kipakzaw ding leh Paul mah leng kipahpih ding in ngen hi.

Thukhitna: Tutung a i gen noppen ahihleh gintute’n niteng hinkhua leh omdan ah Khrist a hinpih Chiang un Missionary hi uhi. Pathian in khovel ah Saptuam a dinkhiak pen Saptuam tungtawn a Pathian’ Kumpigam keklet a om ding chih ahi. Missions lungput nei a hinkhua zang ding i chih Chiang in thu tuampi gen hilou in saptuam sung ah ki-itna, kituahna, pumkhatsuahna, lungput kibang a khosakna leh midangte amasa a koihna ahi. Tanchin Hoih hinpih ding a tatkhiahte i hildan i kiphawk Chiang in saptuam pen muhtheih leh theihtheih in Tanchin Hoih thilhihtheihna in a khekte, chi’n mite’n hon thei ding uhi. Huai tungtawn in midangte Khrist a om hinna leh A itna huangsung a hiplut in om ding uhi. Pathian in a hotdamna thilgel ah thuakna leh kipumpiakna a louthelou suak hi. Huai ahihman in missions nasepna ah Tanchin Hoih a ding a thuakngamna, mahni kimangngilhna, leh midangte a masazaw a koih ngamna ahi. ■



Gammial Aw

Pathian Missions sem a tuni chiang saptuamte'n field tungtawn leh pawldang toh i sepkhawmna a kalsuannate thawnlou ahih dan muh theih a omzelte thupi i sa a, hiai tan honpi Toupa thupina tengteng i pe masa hi. Ei hihtheih bangmah omlou hinapi in thilpiak leh thumna a chihtakna suah a, na thum a thilpiak a na pezelte ziaak leh semtute'n kuhkaltak a hong pannate uh ziaak a Jesu Khrist khebul a khamangthangte pilut a om thei zel ahi chih i mu thei a, kipahhuai i sa mahmah hi. Tangthupha zalentak a tangkoupih a kalsuan tu hun a ding a thil haksapi ahihdan i muh theih ban ah, ginna ziaak a sawina tuak tamtak muh theih ding om gige hi. Gingtute'n naksem a gamkuankhete thumna leh i pan theihna lamlam a pang a amaute nungthuap poimoh mahmah hi. Tua ding in saptuam mite'n i hih theihna zahzah suah a naksem a pangtou zel lai ding in i kingen hi. Toupa'n field a semtute kalsuanna leh a misiangthoute thumnate hon vuaksuaksak lou ahihdan hiai anuai ah enkhawm nawn ni.

A. HIMALAYAN MISSIONS FIELD

KIPATHU GENNA LEH THUMNA DINGTE:

1. Toupa'n field a semtute kalsuanna tungtawn a gah kipahhuaitak gingthak 11 (Jorethang -2, Angepa-1, Budhanare-1, Birtamod-1, Jirmale-1, Angkhop-3 & Haldibari-2) leh baptisna tangthak mi 21 (Haldibari-5, Biramod-1, Angkhop- 4, Kharkagau-2, Angepa-6, Dharampur-2 & Damak-1) hon piaknawnte ziaak in kipathu gen ni. Gingthak leh baptisna tangthakte i na thumpih zel bang in, amaute khalam kalsuanna ding uah Toupa ompihna toh gin-om, muanhuai leh hangsantak a kal hon suan zomzel theihna ding un thumpih ni.
2. Field a semtute'n station tuamtuan a Evangelism Project a neihte uh lamzangtak a zatzoh a om thei ahihman in kipathu gen ni. Hiai hun a semtute'n a panlaknate uh tunung a gah kipahhuaitak muh ahihna ding in thumna toh delhzui lai ni.

3. Field Dorka Khawmpi April 28-30, 2025 sung Birtamode ah lamzang leh lohchingtak a neihzoh in omta, kipahtu gen ni. Hiai khawmpi hun a thu-leh-la sinsak a omte tunung a field a a gah muh ahihna ding in thum ni.
4. Rev Thawndoulia, Director of Missions leh Upa T Paukhansiam, Missions Coordinator in March 26- April 04, 2025 sung Central Nepal leh West Bengal sung a semtute leh a sepna munte uh vehna leh kithuahkhawmna hun manphatak in va neihpih thei uhi, kipahtu gen ni.
5. Sikkim Government lam apan Dan thak a om dungzui in, semtu innluah a omte'n lai poimoh tuamtuam a sai uh ngai chihthu om a, hiai thute'n semtute sepna a sukbuai louhna ding in thum ni. Gingtu khenkhat a sepna uh hiai thu ziaak a buaikha om ahihman un Pathian ompihna ngetsak ni.
6. Toupa'n NEBC sung apan Grace Bible College a sintu ding tuailai mi sawm (10) hon piakte lak ah GBC Graduation Programe April 07, 2025 in mi nga(5) in zoukhe thei uhi. Kipahtu gen in, a sinzom lai dingte leh maban a lam tuamtuam a kalsuanna nei dingte'n Pathian Khasiangthou ompihna toh a maban chiat uh hon sutzop theihna ding un thumpih ni.
7. June 9-11, 2025 sung NEBC Khawmpi om ding, a thak in thumna ah phawk ni. Hiai khawmpi hun pen NEBC a ding a hun poimoh mahmah hiding ahihman in bangmah buaina om lou a, manphatak a zat a hihtheihna ding leh amaute makaihtu ding heutu makai kitelna ding ah Toupan Amah deihbang heutu, Saptuamte itna toh makaih thei ding mi hon piakna ding in thum ni.

B. DHEMAJI MISSIONS FIELD

KIPAHTHU GENNA LEH THUMNA DINGTE:

1. Toupa'n field a semtute kalsuannate tungtawn in EBCC Pityang Chapori ah gingthak Mrs Sunita Kumari Pegu Doley hon pia, kipahtu gen ni. Jesu Khrist nungzui muanhuai leh gin om hong hihna ding un thumpih ni.
2. EBCC Lachangaon a Mass Evangelism neih a hih hun a sukkhak a om ginglou mite lungtang a Pathian in nna a sep a, semtute tungtawn a tanchinhoih chituh ahihna ding in thum ni.

3. Morahuti station a gingtu khenkhatte'n lai a sim theihlounh
ziak un amaute khualna leh a a khalam uh awlmohna zia
in Pathianni Chiang in semtute'n Bible chang sinpih zel uhi.
Lamzang leh lohchingtak a hon sutzop zel theihna ding un
thumpih ni.
4. Field a Nupi Camp March 19-21, 2025 sung neih a om, bangmah
buaina omlou a zatzoh a omtak man in kipahtu gen ni.
5. Field a semtute thumnate gingute omte'n a ngaihnat mahmah
bang un, amaute'n thumnate tungtawn in a damlounhnate ua
pan damna ngahzel uhi. Toupa'n semtute thumna tungtawn
a gingtute leh ginglou mite a ding a damna hon piaksak zelna
ding in thum ni.
6. Shitalmari leh Kebarango khote kiang a tanchinhoih genna
ding lampi Pathian in semtute kong a honsak zia in kipahtu
gen ni. Maban a semtute'n lamzangtak a kal hon suanzom
theihna ding un thumpih ni.
7. Mising leh Assamese a kigawm Laisiangthou (parallel) a
Gospel 4teng leh Nasepte laibu bawlkhiak ding field in tup-
le-ngiim a a neih bang in, mohpuakna piak a om Evan H
Jamkhanmang in lamzang leh chidamtak a hon sepkhiak
theihna ding in thumpih ni.
8. Field a tuailai gingthak omte tungtawn a ginglou tuailaite
sukkhak theih dingdan Plan/Project semtute'n a neih lelte
uh, Khasiangthou ompihna toh lohchingtak a hon sepkhiak
theihna ding un thumpih ni.
9. **Evan Chinkholal Lethil** in a sepna station ah Pathian thu sin
lunglut tuailai om sunsunte samkhawm in One Day Special
class neihpih thei ahihman in kipahtu gen ni. Hiai hun a
tuailai sinsakna piak a omte'n a hinkhiakpih theihna ding
un thum ni. Ban ah, Evan Chinkholal Lethil in a kalsuanna
ah seppih Bidyadhar Taw damtheihna a taksap zia in
nawngkaina tampi om thei zel, thumpih ni.
10. **Evan Haukhosiam Guite leh Evan Vungbiaklun Guite**,
a nupa ua Diabetes, BP, leh Neuro lam ki-enkol ahihman
un, Doctor in a piak damdawite Pathian in a vualzawlsak a,
damna hoihtak a ngahna ding un thumpih ni.

11. Morahuti a om **Mr Bikram Taw** kichi businessman leh a khosung ua thupai mahmah khat inn ah semtute lut in kimeltheihtuahna hoihtak va neihpih thei uhi. Maban a tanchinhoih genpih a ahih theihna ding in thum ni.
12. Bongalmari ah a changchang in ginglou mite leh khosung mite'n khalam a abuaia uh toh kisai'semtute vanaih theizel uhi. Himahleh, a inkuante ua pan lemsaklouna om thei zel, Khasiangthou nasepna tungtawn a amaute'n thutak a theihna ding un thum ni.
13. Namgharia mun a Pathian thu a houlimpiah a omlel **Monika Doley leh Migom Doley** in Jesu a hondampa ding ua hon saan theihna ding un thumpih ni.
14. April kha Bihu Festival Suty sung in Namgharia Study Centre ah Evangelistic Week leh Sports semtute'n lamzangtak in neitheih uhi. Hiai hun a kihelkha khempeuhte'n a thuzakte uh a tak a hon hinkhiakpih theihna ding un thumpih ni.

C. HOJAI MISSIONS FIELD

KIPAHTHU GENNA LEH THUMNA DINGTE:

1. Semtute'n amau mun chiat ah lamzangtak in Ministry neitheih zel uh, kipahthu gen ni. Naupangte lak ah lamzangtak a tuition hon paizompiah ua, ginglou naupang tamsem a kihelna ding un thum ni.
2. Semtute'n tu sum kumthak a sepding a vaiguan thak a neih bangbangte uh Pathian min thupina ding a sepkhiak hong hih a, gah kipahhuaitak muh ahihna ding in thumna toh delhzui ni.
3. Lanka station ah Laxmi Devi a ding in thum zom zel lai ni. A inkuanpihte apan doudalna hong omlouh a, semtute'n hotdamna chialpi a neihpihna tungtawn ua Jesu Khrist hondampa ding a hon saan theihna ding in thumpih ni.
4. Hojai station ah mithak semtute'n a houlimpihte uh; E. Sarat Singha, Mrs Ajanta, Th. Babachan, Th Daina, Mr. Biranta leh Mrs. Bhumika i thumna ah delhzui ni. Amaute lungsim a Khasiangthou in thu a gen a, hotdamna kichiantak a muhna ding un thum ni.
5. Naupangte lak ah tuition tungtawn a nasepna naktak a puahphat sawm in semtute'n panla lel uhi. Lamzangtak a zoh

hong hih a, tangthupha puanzakna ding a mun poimohtak a suahna ding in thum ni.

6. Field a gingu kep a omlel inkuan nihte leh tangval nou khat omte a ding in nakpihtak in thumpih ni. Amaute ginna a naupang chik hilai ahihman un, a ginna uh hon letkip paisuak ua Khrist a ding a nungzui muanhuai ban ah gingleu mite a ding a ettontak hinkhua hon zattheihna ding un thum ni.

D. GOALPARA MISSIONS FIELD

KIPAHTHU GENNA LEH THUMNA DINGTE:

1. Dhupdhara Station pansan a semtu inkuan i neih Evan K Kamkhenthang leh inkuan'te'n chidamtak in semzom theizel uh, kipahtu gen ni. Dhupdhara station ah Football Coaching tungtawn a tanchinhoih gentheihna ding a hong kihonna ding leh a gammi mah seppih theih ding Toupa'n hon piakna ding in thum ni.
2. Balijana station pansan a hun sawtkuamtak a na sem Evan NK Naulak leh Inkuante munthak Borboha Area, Nagoan District a sem ding a suan a om uh toh kion in amaute leng chidamtak in a sepna ding uh munthak tungta uhi. Lamzang leh chidamtak a Pathian ompihna toh hon sepzom ua, Community Health Care Project sutzop ding a sawm uh hong taksuah a, khalam a gah kipahhuaitak muh ahihna ding in thumpih ni.

E. KAMRUP DISTRICT

KIPAHTHU GENNA leh THUMNA DINGTE:

1. Loharghat station ah semtute'n houlimpihsa a neihthe uh kiang ah tangthupha a genpih theih uh om panta hi. Kipahtu gen in, maban a lamzangtak a hon sutzop theihna ding un leng thumna toh delhzui ding in i kingen hi. Hiai station a taksa damlouna nei Mr. Probendro Das, Diganto Rabha, leh Mrs. Rinu Rabha in Pathian thu a zakte uh leh thumsaknate tungtawn a Pathian lam a hong zot theihna ding un thum ni.
2. Chhaygaon station pansan a semtute'n a sepna uh vuaksuak lou a Pathian Khasiangthou thopna toh hong lohchinna ding leh semtu omte'n chidamtak a hon sepzom zel theihna ding un thumpih ni. Hiai station mah a om Rehabali khua a Rabha-

- te school khat pansan a La (song) sinsakna semtute'n neizom theizel uhi. Kipahthu gen in, lamzangtak a hon sutzop ua, La tungtawn a tangthupha puanzak a hihtheihna ding in thum ni.
3. Bamunigaon station ah Mr. Tapan Rabha kiang a Pathian thu kigente a hong gahsua theihna ding in thum ni. Banjay Rabha leh a inkuante kiang a tanchin hoih gentheihna ding hong omna ding in thum ni. Ban ah Mrs. Radhika Rabha leh Tapan Rabha ginna a hong taksuahna ding in thum ni.
 4. Semtute houlimpihsa leh tangthupha genpih khak a omte lungtang a Khasiangthou in nna a sep a, nikhat ni chiang a amaute Khrist khebul a pilut a hihtheihna ding un thum ni.
 5. April 2025 apan semtute'n kong bangkim ah nakzaw sem a panlak a sawm uh, Khasiangthou thopna toh a tup-le-ngiim bang ua kal hon suan gige theihna ding un thumpih ni. ■
-



DORCAS

Corner

1. NUTE NI MESSAGE:

I Saptuam in Nute Ni ni poimoh ahon koihsak zang thei nawn ding a Pathian in hun hoih hon muhsak man in amasa in Amah tung ah kipahthu gen in thupina i pia hi. Koi munpeuh a om Nute tengteng itna chibai k'on buk hi!

Nute mi manphate i hi ua, thihthihtheihna thupitak toh Pathian in a hon thothe i hi uhi. Huaiziak in i manphatna leh i hihtheihnate phawh thak in Khrist leh Saptuamte leh insung leh khotang a ding in panla thak ding in i kichial hi. Nu tampi khovel ana kheh lamdangta aomta a, nang leh ken leng khovel kheh thei i hi.

Timothy nu Iunis leh api Lois in Pathian a aginna neih uh Timothy kiang ah a pesawn uh chih i Tim1:5 ah i mu thei hi. Timothy in ginna anu leh api apat ana ngah ahi a, apa bel Greek mi, ginglou mi hiding a gintak ahi. Timothy nu-le-pa gindan leh tawndan

kibanglou kiteng hiding dan ahi uh. Tang 5 ah, “... *huai ginna atung in na pi Lois ah a-om a, huan na nu Iunis ah, tu in nangmah ah leng a om chih diktak in ka theichian hi*,” chi hi. Hiai a i muh bang in Timothy nu (Iunis) Pathian mitna in a’tapa (Timothi) ginna ah lohzu hi. Kilimbawl ginna hilou, ginna taktak, kamlel a gingta hilou a a tak a hinpih ginna anu leh api apat amuh in a’tapa (Timothi) lungsim thuzoh in a Pathian mitna leh Jesu Khrist ginna ah pilut hi.

Timothi pianna pa Grik, Pathian hing theilou himahleh anu leh api Pathian mitna in Jesu Khrist gingtasak hi. Nute khangbawltu, khangkhektu i hi. I ginna i tate kiang ah i pe sawn dia, i taten amaute khang hong om dingte ah a pesawn ding ua, a khang akhang a piaksawn ding ahi. Huaiziak in nute aw dinmun poimohtak leh mohpuakna thupitak hiai leitung ah neikha i hihman in naktak in panla thak ni.

2. DOTPROJ TOH KISAI

2.1 DOTPROJ 8th Batch zil ding mi 15 lakthak in omta hi. Amaute April 03, 2025 ni in Rev V Nenglian, Director of Development makaih in orientation kinei thei hi. April 04, 2025 in a nu leh pate utoh Dorcas Co-ordinator makaih in kithuahkhawmna hun nuamtak zatpih ahi uh:

A course uh kum khat ding ahihman in damtak a hon zoh khiat theihna ding un thumpih ni. Instructor Mrs Chiinhoihkim leh Asst Instructor Miss Niangthianvung makaih in course kipan nawn theita.

2.2 DOTPROJ 8th Batch 2025:

SI	Min	Pa/Nu/Pasal' Min	Khua/Saptuam	Division
1.	Kimthianmawi	T Ginbiakmang	EBCC Khominthang	Lamka East
2.	Mrs Vungziam	T Pumkhanpau	EBCC Pethuel	Lamka East
3.	Mannunmawi	Haukhanlian	EBCC Lungthul – D	Singngat
4.	Haununmawi	Mangsuanlian	EBCC Lungchin	Singngat
5.	Cecelia Zamawi	Thangliantuang	EBCC Bethlehem	Lamka West
6.	Vungtanmawi	Dongsuanmung	EBCC Kaihlam	Singngat
7.	Haunemsiam	Gouzamuan	EBCC Ngajjang	Singngat
8.	Chinglianvung Dousel	D Ginminlun	EBCC Moria	Lamka West

9.	Nemsianven	(L) Dongkhanlal	EBCC Pethuel	Lamka East
10.	Mavis Ngaisuanmawi	(L) V Damliaikap	EBCC Kangkap	Singngat
11.	Ngaimuanching	Khamkhanlian	EBCC Dorcas Veng	Lamka West
12.	Niangngaihzuai	(L) Tualzakhup	EBCC Zion	Lamka East
13.	Chingngaihdim	K Dongneihlal	EBCC Zenhang Lamka	Lamka North
14.	Sangthanpari	(L) Luna	EBCC Pearsonmun	Lamka West
15.	Hoihsawnkim	Thanggoulia	EBCC Sinzawl	Thanlon

3. DORCED TOH KISAI

Toupa hoihna i tangtou zel a, tukum in leng naupang 140 chawm thei ding in Toupan a hehpihna a hon musak a A min i phat ahi. Toupa tung ah kipathu gen kawm in, Naupangte’n chidamna leh pilna siamna hoihtak a a hon neih theihna ding un thumpih touzel ni. ■



YOUTH

EBCmedia

Corner

tuailai

60 YEARS OF EBC·BYF

2025

KHRIST LEH SAPTUAM DI'N

THUPI: KHRIST LEH SAPTUAM DI'N: TUAILAI
NUNGZUIBAWLTU | MATTHAI 28: 19A

TUP/GOAL: Pathian min thupina ding a Nagot Thupi (Great Commission) semsuah ding a EBC Tuailaite, 2033 tan a i gamsung leh khovel kilchih a mahni deihtelna a Khrist nungzui bawl ding.

Objectives: *Pathian min thupina ding in,*

1. Tuailaite Khrist nungzui ding a sinsakna leh lamhilhna neih ding.
2. Nungzui bawlna ding a guhgel bawlkhiak ding.
3. Tuailaite lak a tha-dual leh bangmah kilawplou a omnate, sahkhua leh ginna apat kigamlatna leh, helnate; itna nasep,

Pathian biakna leh tuailaite a ding a panlak didan gellawkna hoihtak bawlkhiakna tungtawn a sukbei ding.

4. Saptuam tuamtuanme paikhawm a biakkhawmna tungtawn a kichimatsemna bawl ding.
5. Pathian hoihnate dongkhawm a a kumpigam ahong tuntheihna ding a thupuaktu dia i khawmpi pan ding.
6. Vision'33 leh SDG: Sustainable Discipleship Goals patkhiak ding, kum 2033 tan a sepzoh ding nungzuihna nasep puankhiat ding.

Sukkhak dia ngimbiikte

1. Khristian Tuailai Pawl a kum bing a khen:
 - a. Kum 13-17 tuailaite, Child Coordinator makaih in
 - b. 18-35 kikal tuailaite
 - c. 36-45 kikal tuailaite
2. Tuailai tanse-zawte
3. Saptuam tuamtuan a tuailaite

Tup-le-ngim: *Pathian min thupina ding in,*

1. Khrist tungtawn a nam tuamtuanme lak a ki-unauna sukhing thak ding.
2. Each one Teach one Discipleship Commitment a tuailaite tengteng kipiaklutna.
3. Khrist a ki-unauna sukhatna ding a mun poimohte ah Pathian biakkhawmna neih ding.
4. NDPN a kichiam 50% tanbek a kibehlapsak ding.
5. Global Missions a dia tuailai 50 bek kipekhe ding.
6. Khawmpi ma a Tuailai tanse-zawte 1000 tan bek a hinkhua uh sukkhak ding.

Gahsuh ding a lamette:

1. Tuailai tengteng in Toupa Jesu hon sinsakna bang a nungzuihna theichian ding uh a, nungzui-bawltu hong suak ding uhi. Khangthak nungzui-bawltu.
2. Khangthalte'n chi-le-zat a kideidanna sang a sauzaw muhna hon nei ding ua, i niteng hinkhua leh nekzonna ah nungzuihna in hon zelsuak ding hi.
3. Saptuamte tangthupha phuangzaktu apan kalsuantou in nungzui-bawltu saptuam in khangtou ding uhi.
4. Tuailai kikhopnate leh biakkhawmnate ah Khasiangthou pina leh ompihna naktak in kibehlap ding.
5. Tuailai tamsem Global Missions ah hong kizangtou ding uhi. ■



CHILDREN'S *Corner*

NAUPANGTE LAK AH KHALAM NASEPNA: Saptuam in naupangte lak ah khalam nasepna tunitan a sunzom thei a i om man in kipah huai hi. I heutu masate'n muhkhohlna hoihtak nei in Manipur singtanggam ah Tanchinhoih hong lut toh kiton in naupangte veina, awlmohna na nei uh a, hihtheih khomkhom in naupangte lak ah khalam nasepna na pantou uhi. Department chiah om naikei mahleh Kum 1933 in Mr. H H Coleman in Pastor Kaineng kiang ah Child Evangelist nasepna guan in children ministry ana kipantou ahi.

1. SUNDAY SCHOOL: Sunday school chi a i heutu masate'n hon patpih uh tuh naupangte khalam thilte a hinkhua ua nei ding leh, tuate zangkhe ding a kisinsakna munpi ahi. Siamsinna schoolte toh kibang hetlou lah paidan leh sinsakdan ah kibang i sakkhak dekdek uh ahi. Khristianna kisinsakna (Christian Education) munpi ahi a, a siampen, a hoihipen zonkhiakna ding a kitaitehna mun leng ahikei hi. Tunitan a hiai khengkhe thei ding nasepna omlou phial chi a i theih ahi. Hiai nasepna Saptuam malakna nuai a kipan ahi a, EBC Saptuamte naupang Sunday School neilou omlou phial ding in gintakhuai hi. Pathian in hiai nasepna hon vualzawlsak hi in i thei a, hoihtak a neu apan Sunday School a na kaitoute zaw, lampi tuamtuum va tawnkha sam mahle uh bangchichi hiam a Toupa' sapna za in lamdik hong kik thei uh hi in i thei hi. Khelhna a tummang vungvung, sapkik bat nawnlouh i chihte zaw neulai a Sunday School natawm a na ngaihsakloute ahi nuam uhi. Hiai nasepna huntawk ahi chi i hikei a, a diktak in tua i paidan sang a hoihzaw leh lohchin huaizaw ding leng tampi omkha ding hi. Himahleh, i gen ut pen zaw, chingloutak a i sepkhak sunsunte Toupa'n hon vualzawl ahi chih ahi.

2. EVANGELISTIC MEETS/EVENTS: Sunday School kia hilou in, Saptuam leh school omte mah inleng Evangelism lam awlmohna liantak nei in, events tuamtuum a na sai zel uhi. A kum dungzui ua a

thil phutkhakte uh Laisiangthou toh kituak a kisinsakna, hotdamna chialpi, camp, leh a dangdangte kisinsakna thil poimoh mahmah ahi. Khovel kikheng hat mahmah lak ah, a tung a kigen thil lunglut huai tuamtuam tampi'n a sukkhak naupangte'n khovel thilte sang a Pathian lauh ding, Pathian biak ding, lamet pen a neih ding chihte a hon theihlauh khak ding uh thil lauhuai penpen ahi. Khovel pilna, sum-le-pai tampi toh Pathian' be nuam lou, thupina pe nuamlou khang manoh i hihkhak leh thil poi mahmah hiding hi. I Saptuam in a thuak dia, i insung inleng a thuak ding hi. Tangvalnou khat in ka kiang ah "Pastor pa, theihtawp suah a pang hang a, tha-le-zung, sum-le-pai tampi seng a lohchinna i ngah nung a "Pathian ziak ahi, Pathian vualzawl na ahi" chithe i ding i hia? chi in hon dongkha ngei hi.

Khangthak tampite'n a hinkhua ua Pathian telna muthei nawnlou uhi. Melma Setan in a khalam mitte uh mialsak a hihman in, damna pepa, lungsim ngaihtuah theihna pepa, amaute ompih tawntung Pathian thilhihte mulou in, amau hatna, siamna, pilna toh a lohkhiaat banga ngaihtuah in Pathian biakna ding ziak, Pathian tung ah kipahtu genna di ziahte theituan lou, amau hoihhoih a hoih, khangthak tampi om uhi. Huchi bangmite lak ah Pathian' thu hoihtak a i chii tuh ding uh, khovel thil lungluthuai tampi lak apan amaute i sapkhiak ua, biak ding Pathian, biaktak Pathian ahihdan i sinsak ding uh eite mohpuak ahi. Nu-le-pa tampite'n leng salam thilte lunggulh gawp a, khangthakte'n huai thilte hon neih nak uleh lungkim i hihkhak ding a lauhhuai mahmah hi.

3. NAUPANGTE A MAL A HOULIMPIH (PERSONAL COUNSELLING): Naupang a tuambiik a houpiah (personal counselling) poimoh tam mahmah hi. Inkuan haksatna ziak bang, khotang buaina a kihel luat ziak bang leh khamtheih ban ah kizopna kisia (broken relationship) te ziak khawng a counselling poimoh ahi uhi. Hiaibang nasepna ah Sunday school sinsaktute'n leng hihtheih bang panla sam mahle uh a poimoh chiang kisukha zoulou deuh hi a theih in om hi. Counsellor lam a Pathian mizat i gam in a poimoh hi. Leitung damsung hun a a-sia a-pha hong tung zelte maituah dingdan theilou, zu-le-sa leh khamtheih khawng ah a dawnna (solution) om ding sa a tua sung ah ana lutkha tampi om hi. A mulkimhuai tawpkhawk ah kingaihsiatna

leh mahni hinkhua natawm ana la leng i lak ah omta ahihman in poi mahmah hi. Huchi bang mite'n mimaltak ah a buaina uh genpih a, Jesu Khrist khebul ah piluttu ding a poimoh lua uhi. Bethsaida dil kitoh hun a dil sung a va diahtu ding kum 38 sung vingveng damlou khat in a ngak bang in i khopi sung ah tuabang a panpihtu ding khangthak naupange'n a poimoh uhi.

A tunga i gente semkhe ding a Pathian in hon sam hi a na theih leh, Toupa sapna kitheihmoh kei in, siamlou lua, chinglou lua kisakna khawng ziak a Toupa nasepna kihepkhiak san louh ding ahi. Aman a thupina a dawdna ding in a siampente le a zang thei a, a siamlou pente leng a zang thei hi. ■



Mu[♩]ic Corner

NGAIHKHIAK TAWLDAMHUI AW GIN DIK

(Mastering Pitch and Developing a Pleasing tone)

Eite a ding a hong si a thounawn i Lal leh Hondampa Jesu Khrist min in Chibai! April kha in la leh music lam lunglutte a ding bik a poimoh mahmah “Aw sawizoina ding a poimoh khenkhatte” (*Vocal Warm-up Exercise*) toh kisai i na genta hi. Tutung in ahihle phatna la siasiam leh lapawl sate’ masawwna ding ngimna in “Ngaihkhiaik tawldamhuai Aw gin dik” (*Mastering Pitch and Developing a pleasing tone*) toh kisai saulou in gen leng i chi hi.

Tumging tuamtuahten ging dik apoimoh chiat bang un mihingten leng aw gin dik poimoh mahmah hi. Musical instrument tuamtuahten ging hekdikna neichiat uhi. Etsakna ding in Guitar tuner, Piano tuner, Drum Tuner, Bass Tuner, Violin & Cello Tuner leh adangdang bang om hi. Hiaite zang in tumging chituahtuamte amau gin dingdantak a a ginkhawm diamdiam theihna ding un hekdik ngaisek hi.

Khangnou ‘aw’ kikhek hun om a, ‘aw’ kikhek hun tuh hun poimoh mahmah ahi. ‘Aw’ dik-leh-tang (*perfect pitch*) a i saktheihna ding in hiai hun a kisinsiam ngeingei ding ahi. ‘Aw leng’(*out-of-tune*) i chi hiam, ahihkei leh midang toh aw kibang a sakhawm theilouten

midang toh sakkhawm theihna ding in vocal training/tuning i ngaihpoimoh mahmah ding ahi. 'Aw Dik' mahni a kisinsiam theihna ding bangzah hiam genleng i chi hi.

1. Aw Dik (*Vocal Tuning*):

- Aw ginlaipen (middle range) leh saknuam pen ah kisinpat ding ahi. *Eg.*, (d-d') vowel aw ging tuamtuumte ("ah" "oo" leh "ee") zang a sau lawlou awikawm a sakkhiakdan hoih leh dik a sak kisin ding ahi.
- Piano/Guitar leh tuner applications tuamtuumte zang a agindan hoihtak a ngaikhia a note tuamtuumte gindan diktak zuikawm a sakdan kisin ding ahi. *Eg.*, C-D-E-F-G-A-B-C (d-r m-f-s-l-t-d') awl-awl a note tumkawm a asang lam leh aniam lam gingte vowel aw ginte zang a sakdik kisin tam ding ahi.
- Note khat apan *note* dang na sak ding chiang in nem leh maam tak a (*smooth transition*) khek ding ahi. *Eg.*, (d-m-d-f-d-s-d-l-d-t-d-l-d-s-d-f-d-m-d-d') note ging toh na sak ging a kituak hiam chih ngaikhekawm a kinohlou a tamtheilam saknawn ding ahi.

Hiai atung a i gente in *music note* khatpeuhpeuh agin diktak a saktheihna ding leh aw-laite a ding a kisinna ding lamlahna khat ahiah lamet ahi.

2. Bilpil (*Active Listening*): Aw gindik i neihtheihna ding in i zakna lam ahohi mahmah ngai hi. Lasak panpihtu *music track* hiam, *live music* kitumte hitaleh, hoihtak a i zak a i zuihsiam poimoh mahmah hi. Zakna lam a buaisim leh, aw gin toh *music track* kituaklou pah a, aw ginkhiak dan nalhlou pah hi. Huaiziak in, bilpil i neihtheihna ding in ear (*hearing*) training poimoh mahmah a *ear training* neih dingdan saulou in i en ding.

- *Note* ging khat-le-khat kal (*unison, thirds, fifths*) solfa note gin mai a leng theihtheih sawm ding ahi. *Mobile phone keyboard applications, Guitar applications* leh adangdang pansan a agingte zuihtam a *note* kaal kigamlat dan theihtheih sawm ding ahi.
- *Chords* leh *harmony* toh kisai ahiahleh, chiiktak a sui (*analysis*) hiam, ging kigawmkhawmte hoihtak a ngaihkhia a leng *major Chord, minor Chord, diminished Chord, major seventh Chord* leh adangdang ahi chih theihtheih sawm ding ahi.

Lasak aw ging leh a music a kituah chiang in a ngaikhet a ding in tawldamhuai a, siam sak in leng ompah hi. Aw hoih mahmah

nei ahihhang a, a khuang toh satuakthei mahmah lou hiam, lasak aw gin toh music ging kituaklou ngaihkhiaik nuamtheilou ahihman in, sakdik kisin a, midang toh sakkhawm tam leh ngaihkhiaiknuam dinga mahni a kisin tam poimoh mahmah hi. Toupon Amah phatna la sathei zel ding, lamkaih theizel ding leh Phatna lasak kichi Pathian' gamna sepna a panmun poimohtak ahih kawmkawm in theihtawp suah a kisin a, kisuuk a, Amah min thupina ding kia a kizang theizel ding in hon makaih in hon vualzawl hen aw. ■



EBC Innsung Thu

Reports

Home School Syllabus Orientation: CES Manual 2023 Pilot Project tungtawn in Kaikhoen Academy leh CEHS Sinzawlte a lower [foundation] section ah Home School Syllabus zat dia ngim ahih toh kiton in Orientation program Suangdoh ah neih ahi. Hiai hun ah Kaikhoen Academy leh CES D Leikot apan teacher 9 paikhawm in Suangdoh ah Coordinator, CESTTI in sinsakna April 4, 2025 zing 9:30AM apan 4:30PM tan neihpih hi. Manpha sa mahmah uhi.

Kitchen & Study Hall honna: CES Thanlon etkaina nuai a om EBC Hostel Thanlon ah Kitchen leh Study Hall building kibawl thak honna leh latna April 04, 2025 zinglam 9:30 in neih ahi. Hiai program zoh in Mualnuam ah staff quarters luite enkhia in, CES Lungthul school building renovation etkhiakna leng kinei hi.

Report Petu: Rev. Nenglian Vualnam, DD/EBC

Memeng Biakin Honna Report: Memeng Biakin pen Headquarters huhna toh 2022 kum a ana kibawl, ana kizangta himahleh, lamet phaklough leh deihhuai hetlou menchim in September 28 2024 in hon hihsiatsak hi. Huai hun in chimoh leh mangbangtak in ki-om a, huchihlai in, heutute (Headquarters) kiang ah hong kitai leh, deihsakna toh huhna (*relief fund*) kintak a na hon bawlsak ziaik un Pathian min in Saptuamte sik-le-tang in na tung uah kipapthu k'on gen hi.

Huai huhnate huai hun a siatna tuak mimal leh Saptuam bangzah hiamte lak ah ana kihawm zak thei ahihman in manpha petmah hi. Huailak ah, Memeng Biakin pen a vanluite zatttheih lai ding teng hoihtak a kikem in, huaite ban ah a poimoh van dangte leina ding in relief fund apan Rs 2,50,000/- (NC Two Lakhs Fifty Thousand) only kipia hi.

Huaite zang in November 21, 2024 in Biakin thak kibawl pan nawn a, a letdan: **(i) Adung ft 28 (ii) Avai ft 16** a lian in kibawl thak thei hi. Hiai nasepna ah a vek a kiseng tengteng Rs. 3,01,934/- (NC Three Lakhs One Thousand Nine Hundred and Thirty Four) ahi. Nisim 26 February 2025, zinglam dak 10:00am in Pathian min thupina ding in Field Superintendent in a honna leh latna nei hi. Halleluia!

NEBC Field Dorcas Committee saina a Free Medical Camp Report: Field Dorka pawl makaih in Free Medical Camp nisim 14th March 2025 ni'n NEBC Biakin, Bihidin ah kinei hi.

Hiai hun in City Hospital, Budhabare neitu ei Saptuam member mah Mr Nima Tamang toh saikhom theih a aom ziaik in kizangkhai tuan mahmah hi. Camp neih hun in Dr Pankaj Ram Kumar in damloute en a, huai hun a damlou ki-ensak tengteng mi 130 (Hundred Thirty) pha hi. Damlou ki-ensak peuhmah mental counselling leh spiritual counselling kinei in thumna toh kikhakhe zel hi.

Hun zat ahihsung in Toupa Kha Siangthou in nasem ahi ding a, mi 4 in Jesu a hondampa ding un hon sang thei uh a, Huaite ban ah kum 4 bang ana nungtolhsa nupi khat tunding in om nawn hi. Hiai nupite inkuan a zing Kiginni zingkal a va kiveh in, a pasal leh a tate 2 (inkuan mi 4) leng phawtkik a om in, Saptuamten Pathian biakkhawmna hun ah a inkuan un hong telthei pah uhi. Hiaite banah, medical camp ah hong ki-ensak, gingu hilou mi 10 val bang Kiginni biakna hun ah hontel thei ua, biakna zoh in houlimpihn leh thumsakna kinei in, Pastor leh Saptuam heutute khut ah ana delhzui ding ua pekhia in, Pathian apan vualzawl na hun manpha takmai kizang thei hi.

Hiai program ding a kihelkha, amun a kuantie kia hilou, sum le pai a pang Headquarters leh, Saptuam a thumtu honna thumpihte leh lawm-le-vual koi lamlam hiam apan hon na thumpihte na vek ua tungah seppih Field Dorcate sik-le-tang in kipathu ka hon gen hi.

Toupa'n nnahoih semzom thei zel ding in hon vualzawl chiat hen aw.

Report Petu: Rev. Dr. Thangminlun Mangte, FS/HMF ■

Thu Tuamtuum

KIPAHTHU GENNA : Pathian' ompihna leh saptuam heutute' deihsakna in EBCC Selamat, Sialkal Division in biakin thak a paissa January 31, 2025 in a honna leh latna Rev. V Goubiakmuan, Divisional Superintendent tungtawn in ka na nei uhi. Chikmah a leng ka neih zoh ding ua ka kikoihlouh uh biakin building hoihtak lamna ding a huhna hon pete - EBC Hqtrs. in Rs. 4.5 lakhs, DEC Sialkal Division in Rs. 50,000, Division sung a tualsung saptuamte, khosung vaipawte leh pawl tuamtuumte leh mimal a huhna (sum ah hi in tha leh van ah hitaleh) hon petute tengteng tung ah kipahthu ka hon gen a, Pathian in a leh tampi in hon vualzawl hen!

- **Upa Chinzago**, *Chairman, EBCC Selamat*

KIPAH THUGENNA: Lametnamun a Staff Quarters cum Office building thak bawl ding 3 year Plan a kiguang, 2024-2025 a dia HQ in Rs 20 lakhs Budget hon koihsak leh quarter furnishing leh Hall bawl thakna ding a Supplementary Budget Rs. 5 Lakhs EBC Hq in hon sanction pansan in Staff quarters leh furnishing basement floor zoh hita in, General Secretary EBC Rev. K Kamchinkhup in March 12, 2025 in a honna leh latna nei hi. Hall kibawl thak leng zoh hita in, Director Development EBC Rev Nenglian Vualnam in April 3, 2025 in a honna leh latna nei hi. Pathian hoihna leh heutute awlmohna ziaak a LRRC tungtawn a i saptuam nasepna poimohtak adia mun-le-mual thakte ziaak in Pathian leh heutute tung ah Management Committee, Semtute leh Inmates-te sik-le-tang in kipahthu ka gen ahi.

- **Upa T. Langsanglian**, *Secretary LRRC-HCB*

KIPAHTHU GENNA: EBC HQ panpihna tungtawn a CES Lungchin Head Masters' Quaters lamthak a om Date- 06 April 2025 Pathian in Area Pastor Paugousiam Ngaihte in Pathian min in Honna & Latna nei hi. Hiai Quarter lamthakna toh kisai in 3rd February 2025 apan 17th March 2025 sung khawllou a sepzom ahi. Mistry lalou in khosung/Saptuam mite'n tha-le-zung seng ngekngeknge a tha 342 sennung in luahtheih dia zoh ahihtak ziaak in, kong tuamtuum

a panpihna honpia leh tha leh zung mahmah toh hongpangte tengteng tung ah Pathian min in kipahthu k'on gen hi.

- **M Nenglianmang**, *Head Master CES Lungchin*

KIPAHTHU GENNA: EBCC Suangdoh Pastor Quarters a meivak ginalou a ka buai mahmah lai un EBC Headquarters kithuahpihna toh inverter set thak (Dual Battery & 24 Voltage inverter) leikhiak theih in om hi. Tu in meivak kia hilou a, Office work tengteng leng septheihta ding ahihman in kipahna lian mahmah hi.

Tua banah Heutupa Lalmangaih Hauzel in saptuamte power point projector a zat ding pointer hoihtak hon pia a, kipahna lian mahmah hi.

Saptuam heutute leh mi malmalte tung ah kiapahthu ka hon gen uhi. Toupa'n aleh tampi'n noute hon vualzawl hen, chih ka thumna uh ahi.

- **Upa M Khamkhanhau**, *Secretary, TBUC EBCC Suangdoh*

KIPAHTHU GENNA: EBCC Teikhang in April 10-13, 2025 sung Numei Lehlang Chialpina lohching leh gahsuahtak in ka nei uhi. Hiai hun Rev Gin Malsawm, GBC Principal in thugenna hun hong zang hi. Hiai hun ah kihel thei mi 60-70 kikal ahi, hiai hun sung a kul leh poimoh bangkim TBUC EBCC Teikhang in mohpuakna la in fel leh kizentak in vaisai ahi. Chialpina tungtawn in hotdamna theithak akilan, halhthakna, kilat thakna leh Khrist in hon ngaihdam bang in chi a kingaidam leh siangthouna hinkhua pan ding a kilanthak Pathian in hun khoptak hon piak ziak in Thupina tengteng Pathian i pia hi. Hiai chialpina gahsuahtak leh lohchinna ding a thumna toh ana pang kuapeuh tung ah kipahthu ka gen uhi. Pathian kia in thupina tang leh i chi ahi.

- **Upa Ginkhup Guite**, *Secretary, TBUC EBCC, Teikhang*

KIPAHTHU GENNA: EBC HQ deihsakna ziak in CES New Kangkap in staff Quarters thak neithe i a om ka hihman un ka kipak mahmah ua kipahthu KTZ tungtawn in ka hon taklang uhi. Hiai staff quarters honna leh latna bialtu Pastor TK Khual Gualnam in February 26, 2025 in nei hi. Hiai quarters tungtawn in Toupa'n thupina tengteng tang leh i chi ahi.

- **K Dammuanlal**, *Secretary LSC, New Kangkap* ■



Ordain Sunna

1. Min: **PASTOR H JAMKHANPAU**
2. Pianni: September 25, 1962
3. Baptisma tanni: February 15, 1979
Tangsaktu: (L) Rev. V Laljem
4. Pa Min: H Dongneng
5. Nu Min: (L) Zamkopniang
6. Zi min: Mrs. Jammuanching
7. Kitenni: March 06, 1983
Kitengsaktu: (L) Rev. S. Jamchinpau
8. Gil a gah goutan neihzah: 4, Pasal: 1, Numei: 3
9. Tulel a omna Saptuam: EBCC Lungthul D
10. Tulel a kizatna: Pastor
11. Ordain Kum: December 1989, Singngat,
Ordain Petu: (L) Rev. T. Jamkhotang
12. Pastor Ordain Kum: December 08, 1992
Pastor seppat kum : January 1992 (Pro Pastor)
13. Toupa kiang a tawldam ni: March 26, 2025,
Vui ni: March 27, 2025
15. Vuitu Pastor & Saptuam: Pastor V Pauthianmuan, EBCC Mata
16. Toupa gam nasepna a sephakna munte:
 - 1) 1992 – 1996 D. Leikot station, Bial: Songjang, Phailen, Purum Geljang leh Satang
 - 2) 1993 – 1996 Tribal Colony station a nei, bial behlap: Chandel leh Moreh
 - 3) 1998 – 1999 June, Lamphel
 - 4) 1999 – 2000 Kaihlam
 - 5) 2001 - Tonglon T, Bial: Tonglon P, Vokbual L
 - 6) 2002 – 2006 Bungmual
 - 7) 2007 – 2011 Central Lamka, Bial: Lailam Veng, Zoan
 - 8) 2012 – 2014 G. Mualkawi, Bial: Mualpi, Mission Compound, Tangnuan & D. Leikot
 - 9) 2015 – 2018 Hebron, New Lamka
 - 10) 2020 DS Office, Mizoram Division
 - 11) 2021 – 2023 Khuangkhai, Bial: Gamphazawl, P. Jordan, Phaisan
 - 12) 2024 – 2025* Lungthul D, Bial: Lungthul L



Toupa Kha Siangthou in a nutsiat a inkuan leh Saptuamte khamuan in makaih zelta hen. ■



MAY 2025

Kipahthu Genna leh THUMNA DINGTE

1 NINGANI: May kha hon musak Pathian kiang kipahthu gen ni. May 1-4 sung ZPCS Tuibong in Khanglai Camp nei ding a, Evan Upa Lianding Guite thugenpi in pang ding, thumna ah phawk ni. # Dr Samuel Mungpu in May 1-7 sung Saptuam tuamtuam ah hun zang ding, manpha leh lohching ahihna ding in thumna ah phawk ni. # May 2-4 sung EBCC Lamzang in Second Coming Chialpi nei ding a, Rev Ginmawsawm, Principal, GBC thugenpi in pang ding, thumpih ni.

2 SINTAWPNI: May 2 in Assam Field a semtuten Workers Meet nei ding ua, Upa T Paukhansiam, Missions Co-ordinator in va uap ding, banah, May 3 – 14 sung EBCC Guwahati in Missionary Day leh Missions Motivation hun zang ding a, Missions Co-ordinator in makaih ding, thumna ah phawk ni.

3 KIGINNI: May 5-7 sung, Missionary Day huam in EBCC Pearsonmun in Nungzuihna Chialpi zang ding a, Rev B Chinkhengoupau, Youth Co-ordinator in Pathian thutak gen ding. # May 4 in Rev Tuang Lang, DS Lamka East leh DBDC kithuah in EBCC T Khuangkhai leh EBCC Phaisan veh ding uh, thumna ah phawk ni.

4 NIPINI: May 5-7 sung EBCC Newlane in Tualsung Missions Khawmpi zang ding a, Rev K Kamchinkhup, GS thugenpi in pang ding. Hiai hun toh kituak mah in EBCC Dorcas Veng in Missions Chialpi nei ding a, Rev Nenglian Vualnam, Director of Development thugenpi hiding, thumna ah phawk ni.

5 SEPPATNI: May 6-7 sung EBCC Lamka Baptist Church in Missionary Day zang ding a, Evan Upa Lianding Guite thugenpi in pang ding. Hiai hun toh kituak mah ah Rev Ginmawsawm, Principal, GBC in EBCC Central Lamka ah thugenna hun zang ding. # May 5-6 in GBC in Admission Test leh Interview nei ding, felleh kizentak a sai ahihna ding in thumpih ni.

6 SEPNAWNNI: May 7, Missionary Day ah Evan M Thangminlian in EBCC Vaalveng ah zang ding, Rev Tuang Lang, DS Lamka East in EBCC College Veng ah, Rev Khamkhanchin Ngaihte, DS Singngat in EBCC Kangkap ah, Rev L Khaikhansong, DS Lamka North in EBCC Mawnglian ah zang ding a, Rev V Goubiakmuan, DS Sialkal Division in EBCC Khawkawn ah hun zang ding, Pathian ompihna leh makaihna ngen in thumna ah phawk ni.

7 NILAINI: Tuni Missionary Day ah Rev Pumsuanmung Naulak, DS Lamka West in EBCC Hebron ah thugen ding a, Rev Thawndoulain, Director of Missions in EBCC Mission Compound leh Rev M Zalian Guite, Director of Ministries in EBCC Jordan ah hun zang ding a, Rev T Thangzasiam, DS Lamka South in EBCC Khominthang ah hun zang ding, amaute thumna ah phawk ni. May 8-9 in EBC Sialkal Division in Workers Meet nei ding, thumna ah phawk ni.

8 NINGANI: May 9-11 sung EBCC Bethlehem in Nute Ni-cum-Chialpi nei ding a, Evan Upa Lianding Guite in Pathian thutak gen ding, hiai hun toh kituak mah in EBCC Pearsonmun ah Rev Pumsuanmung Naulak in thugenna hun zang ding a, Rev Gin Malsawm, Principal, GBC in EBCC Dorcas Veng leh Nemlawmching Dorcas Co-ordinator in EBCC Moria ah hunzang ding uh, thumpih ni.

9 SINTAWPNI: May 10 in Calvary Baptist Church, V Munhoih in Mission Chialpi nei ding a, Rev L Khaikhansong, DS Lamka North thugenpi in pang ding, thumna ah phawk ni.

10 KIGINNI: May 11 in Rev Tuang Lang, DS Lamka East in EBCC Khominthang ah Missions Motivation hun zang ding. Hiai hun mah in Rev Khamkhanchin Ngaihte, DS Singngat in EBCC Singngat ah Missions Motivation hun zang ding a, Rev L Khaikhansong, DS Lamka North in EBCC Central Lamka ah Couples Seminar makaih ding, thumna ah phawk ni.

11 NIPINI: Tuni Nute Nipini ah Rev K Kamchinkhup, GS in EBCC

College Veng ah thugenna hun zang ding a, Rev M Zalian Guite, Director of Ministries in EBCC Hebron thugen ding, thumna ah phawk ni.

12 SEPPATNI: May 12-June 6 sung GBC in Basic English Course sai ding lohchingtak a zoh ahihna ding in thumna ah phawk ni. # Pathian in i budget val A vualzawlina hon piak ziak a kipahthu gen in, sum kumthak a leng A vualzawlina tamsem i tanna ding in thum ni.

13 SEPNAWNNI: May 15-18 sung EBCC Vaikhotlang in Chialpi nei ding a, Rev Pumsuanmung Naulak thugenpi in pang ding, chialpi lohching ahihna ding in thumpih ni.

14 NILAINI: May 15-18 sung EBCC Shillong in BCD Camp nei ding a, Rev B Chinkhengoupau, Youth Co-ordinator thugenpi in pang ding, thumpih ni.

15 NINGANI: May 16-18 sung EBCC Kolkata in BCD Chialpi nei ding a Evan Upa Lianding Guite thugenpi in pang ding, thumna ah phawk ni.

16 SINTAWPNI: May 17 in EBC Elim Veng Biakin thak zoh ahihtoh kiton in, Rev K Kamchinkhup, GS honna leh latna nei ding, thumna ah phawk ni.

17 KIGINNI: May 18 in EBCC Pethuel ah Rev M Zalian Guite, Director of Ministries in thugenna hun zang ding. # May 18 in Rev Tuang Lang, DS Lamka East leh DBDC kithuah in EBCC Gamphzawl leh EBCC P Jordan vehna nei ding uh, thumna ah phawk ni.

18 NIPINI: Pathian vualzawlina toh ORC ah chialpi, camp leh thumna hun zang omthei gige, kipahtu gen in, a enkolte a ding in Toupa huhna leh hihatna ngen in thumpih ni.

19 SEPPATNI: May 19-30 sung EBCC Zion in solfa leh music sinna nei ding a, Thangbiaklal Valte, Music Promoter sinsaktu in pang ding, thumna ah phawk ni.

20 SEPNAWNNI: EBC Central Delhi saina a Evan Teachers city tour project Manipur buaina ziaik a dinkhaw, tukum in kipanthei nawnta, Pathian kiang ah kipahtu gen ni.

21 NILAINI: Saptuam in kepngai naupangte kepna ding a lunggel a neihte taksuah a sepkiak ahihtheihna ding in thumna ah phawk ni.

22 NINGANI: May 23-25 sung EBCC Vengnuam in Hotdamna Chialpi nei ding a, Evan Upa Lianding Guite thugenpi in pang ding, thumna ah phawk ni.

23 SINTAWPNI: May 24-25 sung EBCC Tlangnuam, Aizawl in Nupa Seminar nei ding a, Rev Khamkhanchin Ngaihte, DS Singngat in sinsak in makaih ding. Hiai hun toh kituak mah in Calvary Baptist Church in Pate Seminar nei ding a, Rev Ginmalsawm, Principal, GBC sinsaktu in pang ding, thumna ah phawk ni.

24 KIGINNI: May 24-25 sung EBCC Kanaan in biakna toh kisai kisinsakna nei ding a, Thangbiaklal Valte, Music Promoter in sinsak ding.

25 NIPINI: Convention Book House a semtu feltaktakte ziaik a

kipahthu gen in, amaute'n lamzang leh gahsuh sem a hon sepzel theihna ding un thumpih ni.

26 SEPPATNI: May 26-27 sung SIMNEI Annual Meeting Shillong ah om ding a, Rev Thawndoulia, Director of Missions leh Rev G Thangsanglian, FS Assam va kihel ding uh, thumna ah phawk ni.

27 SEPNAWNNI: May 28-31 sung Khuga Sadar Presbyterian Church, Saipum in Revival Crusade nei ding a, Evan Upa Lianding Guite thugenpi hiding, Camp lohching leh gahsuh ahihna ding in thumpih ni.

28 NILAINI: May 29-June 01 sung CBA Lanva Pawlpi Camp om ding a, Rev B Chinkhengoupau thugenpi in pangding, thumna ah phawk ni.

29 NINGANI: Pathian louma a i sepna, Field Superintendent-te leh missionary-te ziaik a kipahtu gen in, amaute'n khamangthang dingte itna tak toh hon sep zomzel theihna ding un thumna ah phawk ni.

30 SINTAWPNI: PTC makai thak ding a mohpuakna piak a omten Pathian lau leh zahtak kawm a mipite hon makaih theihna ding un Tuglam pilna ngen in thumpih ni. # May 31- June 1 sung EBCC Kawlbem in makai kisinsakna nei ding a, Rev Ginmalsawm, Principal, GBC sinsaktu in pang ding, thumna ah phawk ni.

31 KIGINNI: NDPN nuai a Coaching kai, training lel leh sepna neitate ziaik a kipahtu gen in, amaute'n Pathian mission theichian mahmah kawm a pan hon lakzom zelna ding un thumpih ni. ■

Postal Regd. No. MNP 07 | Regd. No. 2234470

BOOK POST

If undelivered, please return to

The Editor,

Khristian Thukizakna

P.O. Box-6, Dorcas Hall,
New Lamka-795006, Manipur, India



MAY 11, 2025

Edited & Published by Rev. K. Kamchinkhup for the Evangelical Baptist Convention
Designed and Printed at Convention Book House, Dorcas Hall Campus, New Lamka - 795006